

# 1 Corintios

## Pablo Goãmũ yaräre Corinto majaräre gojabeoñumi

**1** 1-2 Yũhũ Pablo, Jesucristo yare ïgũ buhedore apidigu ãhrraa. Goãmũ ïgũ gamero dopa ta Jesu ïgũ apibure yũre beyepũ ïgũ. Sostene Jesu yagũ mari acaweregũ mera mũare Goãmũ yaräre Corinto majaräre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore sererã árĩrã, erã sã Goãmũ yarã ta ãhrrima. Jesucristopũ erã opũ mari Opũ sã ãhrrimi. 3 Eropirã Goãmũ mari Pagũ, mari Opũ Jesucristo mera mũare òadorea. ïgũ itamuri mera òaro árĩque mũa.

### Jesucristopũ mũare òaro iibasadigu árĩmi Goãmũre, arĩ gojañumi Pablo

4 Jesucristo mũare òaro iibasadigu árĩmi Goãmũre. ïgũ eropa iicũ ïagu, Goãmũre yũ mahigũre, Òhaa,” arãa yũhũ ãmũri nũcũ. 5 Cristo yarã mũa árĩcũ ïagu Goãmũpũ mũare òaro árĩcũ iimi. Eropigu ïgũpũ ïgũ yare mũare gajirãre weremorãre iimi ïgũ. Eropigu ïgũ, ïgũ yare òaro masicũ iimi mũare. 6 “Cristo mũare òaro iigũcumĩ,” mũare gũa arĩ werediro ta wahabũ mũare Cristo yarã mũa wacũ. 7 Eropigu árĩpehreri ïgũ ya árĩburire mũa iimasicũ iimi Goãmũ mũare. Eropiro ne duhyabeaa mũare. Mari Opũ Jesucristo i yebague ïgũ dujariborore mũa corerisubu Goãmũpũ mũare eropa itamuniguicãgũcumĩ. 8 Eropigu Jesucristopũ mũa ïgũre umupeoniguicũ iigũ ãhrrimi. ïgũ eropa árĩgũ árĩcũ mũapũ i ãmũ pehrecũ mũa ñeri iira dipuwaja moorã árĩcũ iigũcumĩ. 9 Goãmũ “Òpa iigũra,” ïgũ arĩdiro dopa ta ïgũ iimi. Eropigu ïgũ, ïgũ magũ mari Opũ Jesucristo mera yujuro mera árĩmorãre marire beyedi árĩmi.

### Jesu yarã Corinto majarã erã game dũca warirare Pablo arĩ gojañumi

10 Yũ acawererã, mari Opũ Jesucristo ïgũ dorero mera mũare burigã serẽbu iiaa: Mũa basi game dũyasobiricãque. Eropirã mũa basi game dũca waribiricãro gahmea. Yuju curu ta árĩque mũa. Eropirã yujuropa ta òaro árĩniguicãque. Eropa iirã mũa iiburire pepirã, yujuropa iique mũa. 11 Yũ acawererã, mũa basi game dũyasorã iayoro mũa. Eropa arĩ wereama Cloé ya wihi majarã yũre. 12 Gajirã mũa mera majarã òpa arãñorã: “Pablo ya curu majarã ãhrraa gũa,” arĩ wereniguaiyoro

gajirã mua. Eropirã gajirã “Apolo ya curu majarã ähraa gña,” arãyoro gajirã. Eropirã gajirãpũ daja, “Pedro ya curu majarã ähraa gña,” arãyoro mua. Eropirã gajirãpũ daja, “Gña tamera Cristo ya curu majarã ähraa gña,” arãyoro mua. <sup>13</sup>Mua eropa arĩquerecũ ta yũhũ òpa werea muare: Cristo ya curu majarã yuju curu ta ähraa mari. Eropirã mari basi yujurãyeri dũca warimasibea mari. Yuju curu ta árirã iiaa mari. Yũhũ Cristo áribeaa. Īgũ iidiro dopa mua ya dipuwajare crusague síridigũ áribeaa. Eropigũ muare gajigũ waĩyegũ yaha waĩ mera waĩyebami. Cristo ya waĩ mera waĩyecumi muare. <sup>14</sup>Muare mua mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. “Pablo waĩyenirã dihta ähraa,” arĩmasibea mua. Eropigũ gajirãre waĩyebiridigũ yũ árigũ “Ōhaa,” arĩ pepia Goãmũre. <sup>15</sup>Bajarã masare waĩyedigũ yũ áricũ “Pablo ya waĩ mera ĩgũ waĩyemi gñare,” arĩboaya mua. Eropa arĩrã Jesucristore umupeobirã mua yũpũre umupeoboaya. Eropigũ irire gamebirabũ. <sup>16</sup>Estéfana ya wihi majarã sãre waĩyebũ yũhũ. Erã nũcu ta waĩyebũ yũhũ. Gajirã yũ waĩyenirãre guñabirica. <sup>17</sup>Cristo yũre obeogũ, gajirãre waĩyebure apibirimi ĩgũ yũre. Ōari buherire werebupũre apimi ĩgũ yũre. Iri òari buheri “Cristo ĩgũ crusague síriñumi,” arĩ buheri masare gohrotori buheri ähraa Goãmũ yare erã iiburire. Eropigũ yũhũ irire buhegũ gajigũ òaro masitarigũ iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mua òari buheripũre umupeobiriboaya.

**Goãmũ ĩgũ turarire ĩgũ masiri sãre opagu  
ährimi Cristo, arĩ gojañumi Pablo**

<sup>18</sup>Peamegue dederemorãpũ iri buheri “Cristo crusague ĩgũ síridi áriñi,” arĩ buherire peerã òpa arĩma: “Pee masibirã ya buheri ähraa,” arĩmaacãma. Maripũ Cristo ĩgũ taumorã árirã òpa arãa: “‘Crusague ĩgũ marire síridi áriñi,’ arĩ buheri tura ähraa. Iri buheri mera Goãmũ marire gohrotomi,” arãa mari. <sup>19</sup>Eropa ta arĩñumi Goãmũpũ ĩgũ yare erã gojarapũgue:

Eropirã i yeba majarã masare “Ōaro masirã ähraa,” erã basi arĩrãre erã masiripũ duhpiburi áribeaa, arĩ ĩhmugũca yũhũ, arĩñumi Goãmũ.

<sup>20</sup>Eropirã i yeba majarã òaro masirã duhpimorã áribeama. Erã pepiro dopa buherã sã duhpimorã áribeama. Dohpaguere wereniguimehrerã sã duhpimorã áribeama. I yeba majarã “Ōaro masirã ährima,” arĩnirã erã arĩquerecũ ta “Pee masibirã erã ährima,” arĩ ĩhmumi Goãmũ erãre.

<sup>21</sup>Goãmũ tamera òaro masigũ ährimi. Īgũ eropa áricũ i yeba majarã erã ya masiri mera Goãmũ yare ne masisũya mariroca erãre. Goãmũ “Erã masiri mera yũre masisome,” ĩgũ arĩdiro dopa ta eropa wahabũ erãre. Ōpa arĩñumi: “Yaha òari buherire werecũ masa yũre masirãcoma,” arĩñumi. Eropigũ “Iri buheri pee masibirã ya buheri ähraa,” gajirã arĩquerecũ, gajirãpũre erã òari buherire peerãpũre Goãmũ taumi. Cristore erã umupeocũ ĩagũ “Erãre peamegue wabonirãre taugũra,” arĩmũhtarũ.

<sup>22</sup>Judio masa deyoro moarire ii ĩhmudorema erã iri buherire umupeoboro core. Eropirã griego masa judio masa áribirã árirãpũ erã pepiro dopa buhecũ gahmema.

<sup>23</sup>Maripũ “Jesucristo mari ñeri iira dipuwaja crusague s̄iridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri àhraa,” arĩma. <sup>24</sup>Goãmũ ìgu yarã árĩmorã ìgu beye aĩnirãpũ iri buherire pee òpa arĩ masima: “Goãmũ masipehogu turagu àhrimi. Cristo marire s̄iribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã. <sup>25</sup>Goãmũ òaro masipehogu àhrimi. “Goãmũ pee masibigu àhrimi,” masa arĩ pepiquerecũ ta i yeba majarã tauru òaro masipehogu àhrimi. Eropigu “Turabigu àhrimi,” masa arĩ pepiquerecũ ta erã wecague turatarinũgagu àhrimi ìgu. <sup>26</sup>Yũ acawererã, Goãmũ mũare ìgu beyeboro core mũa árĩmũhtarare guñaque. I yeba majarã “Òaro masirã àhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tirã oparã sã árĩnirã bajamerãgã àhraa mũa Jesu yarã. <sup>27</sup>I yeba majarã “Pee masibirã àhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Òaro masirã àhrima,” erã arĩnirã erã masibirã dujaboro dopa. Eropigu i yeba majarã “Turabirã, doyarã àhrima,” erã arĩnirãre Goãmũ aĩdigu árĩmi doyarãbirãpũ erã doyarã dujaro dopa. <sup>28</sup>Masa erã ìadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ìgu yarã árĩmorãre aĩdigu árĩmi mũare. Eropa aĩgu i yeba majarã oparãre, guhyadiarãre, “Guapũ bu árĩrã àhraa,” erã arĩcũ iigu iimi Goãmũ erãre. <sup>29</sup>Ìgu eropa iicũ i yeba majarã ne yujugũ ìgu gamero mera “Yũ tamera turagu, òaro masigu àhraa,” arĩ tarinũgamasibeami Goãmũ ìgu iacũ. <sup>30</sup>Goãmũpũ marire Jesucristo yarã árĩcũ iimi. Ìgu yarã árĩrã mũmũri nũcu Goãmũ mera árĩrãca mari. Jesucristopũ Goãmũre òaro masicũ iimi marire. Eropigu mari ñerire cóãgu marire òarire gohrotocũ iigu àhrimi. Eropigu marire peamegue wabonirãre taubu àhrimi. <sup>31</sup>Ìgu eropa iicũ Goãmũ yare erã gojarapũ ìgu arĩ gojadiro dopa ta eropa wahaa. Òpa arĩ gojañuma: “Yũ gamero masipehogu àhraa, arĩgu irire arĩbircãporo. Òpa arĩporo: ‘Mari Opũpũ masipehogu ta àhrimi,’ arĩporo ìgu,” arĩ gojañuma Goãmũ yare erã gojarapũgue.

### Cristo crusague ìgu s̄irira buheri àhraa i, arĩ gojañumi Pablo

**2** <sup>1-2</sup>Yũ acawererã, mũa pohro wabu òpa arĩ pepibũ yũpũ: “Erã mera árĩgu Jesucristo crusague s̄iridigu waĩpeo ìgũre erã masiburi dihtare buhegũra erãre,” arĩ pepibũ mũare. Eropigu mũa pohro árĩgu Goãmũ yare mũare buhebũ. Goãmũ yare mũare buhegu, weretarinũgagu iro dopa “Masitarigu àhraa,” arĩ buhegu iibiribũ. <sup>3</sup>Eropigu mũa mera árĩgu bu árĩgu iro dopa árĩbũ yũhũ. Eropigu yũre umupeori arĩgu doyañariro dopa buhebũ yũhũ. <sup>4</sup>Eropigu Goãmũ yare buhegu “Masipehoa yũhũ,” arĩgu weretarinũgagu iro dopa buhebiribũ. Ìgu yare buhecũ Espiritu Santo ìgu turari mera mũare iri buherire umupeocũ iimi. <sup>5</sup>Eropa ta arĩ buhebũ yũhũ mũare masa erã gamero erã ya masiripũre mũa gamebiriboro dopa. Goãmũpũre mũa umupeoburire eropa arĩ buhebũ yũhũ “Goãmũ turagu àhrimi,” mũa arĩboro dopa.

**Espíritu Santopu Goãmu ïgu áriřicurire buhemi marire, arı gojañumi Pablo**

<sup>6</sup>Eropirã Goãmu ya buherire Jesure ðaro umupeorãguere werea guã. Iri buheri masiri ta ãhraa. I umu maja masa erã gamero erã masiri iro dopa áribeaa i muare guã buheri. I yebare dorerã ya masiri sã áribeaa. Erã masiri i umu mera pehrero iiaa. <sup>7</sup>Goãmu ya masiripure werea. Iribojegue i buherire ne masisũya mariyoro. Negohraguere mari ðaro áriborore Goãmu arı pepituhajamuripu. Marire peamegue wabonirãre ïgu tauborore, ïgu mera mari áriboro sãre “Masare eropa ta iigura,” arı pepiyupu. <sup>8</sup>Ïgu masare ðaro arı pepirare i umure dorerã masibiriñuma. Irire ðaro masirã, mari Opure Goãmu magu gohrare crusague pabia wejëbiriboanuma erã. <sup>9</sup>Erã eropa masibirare Goãmu yare erã gojarapũgue ðpa ãhraa:

Áripehrerã Goãmure mahirã ya áriburire Goãmu ðaro  
amubasayutuhapu. Iri ïgu amubasarapure masare masima masiya  
mara. Ne gajino iro dopa ïaya mara irire, arãa Goãmu yare erã  
gojarapũgue.

<sup>10</sup>Iri eropa arıquerecũ ta Espiritu Santopu Goãmu yare, masisũya marirare masicũ iimi marire. Áripehreri Goãmu yare ïgu pepira sãre Espiritu Santo masipehomi. Eropa masigu ïgu marire irire masicũ iimi.

<sup>11</sup>Ne gajirãpu masu ïgu pepirire masibeama. Masupu ïgu seyaro ïgu guñarigue ïgu pepirire masimi. Eropa ta masa Goãmu ïgu pepirire ne masibeama. Espiritu Santo dihta ïgu pepirire masimi. <sup>12</sup>Eropirã mari Jesu yarã árirã erã i umu majarã Jesu yarã áribirã erã pepiro dopa pepibea. Goãmu ïgu Espiriture ohomi maripure ïgu pepiro dopa mari pepiburire. Ïgu marire ðaro ïgu orare masicũ iimi Espiritu Santopu. <sup>13</sup>Eropirã Goãmu yare muare buherã, masa ya masiri mera guã gamero buhebeaa guã. Espiritu Santo ïgu gamero dopa ïgu guare wereniguidoreripure muare buhea. Eropa buherã Espiritu Santo gamero dopa Goãmu yare ðaro buhea guã ïgu yarãre.

<sup>14</sup>Espiritu Santore opabirãpu irire Espiritu Santo yare erãre buhecũ, “Pee masibirã wereniguiri ãhraa,” arıma erã. Eropirã gamebeama. Espiritu Santo ïgu itamuro mariro ïgu yare masima masiya mara masare. Eropirã erã ïgu yare ne masibeama. <sup>15</sup>Espiritu Santore oparãpu Goãmu yare ðaro masima. Gajirãpu erãre “Pee masibirã ãhrima,” arımasibeama Espiritu Santore oparãre. <sup>16</sup>ðpa arãa Goãmu yare erã gojarapũgue: “Ne yujugu ïgu gamero mera mari Opu ïgu guñarire masigu ne marimi. Eropirã ïgure masa ne buhemasibeama,” arãa ïgu yare erã gojarapũgue. Maripu Cristo yarã árirã, Cristo iro dopa masia.

**Jesu yarã yujuro mera Goãmu mohme corerã  
ãhrima, arı gojañumi Pablo**

**3** <sup>1-2</sup>Yu acawererã, muare buhegu Espiritu Santore ðaro yuhrirãre yu buhediro dopa buhemasibiribu muapure. Mua pepiri Espiritu Santo

opabirã pepiro dopa árĩbũ. Cristo yarã mũa árĩquererã ta ãgũre õaro yũhrirã árĩbirã majirãgã erã pee masibiro dopa ta Goãmũ yare õaro pee masibiribũ mũarũ dohpa. Eropã mũa pee masibiricũ ãgũ Goãmũ yare õarire buhenemomasibiribũ mũare. Eropigũ majirãgãre apĩco dihtare mari oro dopa ta diasabiriri buheri dihtare buhebu daja mũare. Dohpague sãre mũraro ta masinibea dohpa mũa. <sup>3</sup>Õpa iirã iiaa mũa Espĩritu Santore yũhribirã. Mũarũ mũa mera majarãre ãdiabirã, erã gajinore opacũ ãhaturirã, mũa basi yujurãyeri cururi Yũ acawererã, mũare buhegũ Edũca warirã iiaa. Eropirã Espĩritu Santore opabirã Cristore gamebirã iro dopa iirã iiaa mũa. Eropirã Goãmũ yare õaro peebea mũa. <sup>4</sup>Õpa ãhrayoro mũa. “Pablo ya curu majarã ãhraa gũa,” arãyoro mũa yujurãyeri. Eropirã gajirã mũa mera majarãpũ “Apolo ya curu majarã ãhraa gũa tamera,” arãyoro mũa. Eropã arĩ dũyasorã Espĩritu Santore opabirã iro dopa arĩ werenigũia mũa.

<sup>5</sup>¿Yũhũ Pablo, Apolo mera duhpimorã ãhriri gũa mũa pepicũ? Árĩbeaa. Goãmũre mohme corerã ãhraa gũa. Gũare ãgũ iidorero dopa iimorã ãhraa. Eropirã gũa mũare buhecũ peerã Jesucristore umupeonũgabũ mũa. <sup>6</sup>Õari buherire buherã pohegue mohme corerã iro dopa ãhrima mari werenigũ queori mera buhecũ. Pohegue ãgũ otemũhtadiro dopa ta yũhũ mũare Goãmũ yare buhemũhtabũ. Eropigũ gajigũ ãgũ pohere ãhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucũre ãri bũgacũ ãgũ iidiro dopa ta Goãmũpũ mũare ãgũ yare masinemocũ iimi. <sup>7</sup>Eropigũ yũ buhemũhtadi árĩqueregũ ta bu árĩgũ ãhraa. Eropigũ Apolo yũ pũhrũ buhenemodi sã bu árĩgũ ta ãhrimi. Goãmũ tamera õagũ ãhrimi. ãgũpũ mũare ãgũ yarã árĩcũ ãgũre masinemocũ iimi. Eropirã Goãmũpũre umupeoro gahmea mũare. <sup>8</sup>Otemũhtagũ pũhrũ pohere ãhadibugũ yujuro mera mohme corerã ãhrima erã. Eropirã erã nũcũ erã mohmediropẽ ta wajatama erã. Eropã ta ãhraa gũa Apolo mera. <sup>9</sup>Eropirã gũa Goãmũ yare mohme corerã ãhraa. Eropã gũa mohme corerã Apolo yũ mera majagũ ãhrimi. Mũarũ Goãmũ ya pohe iro dopa ta ãhraa. Mũa eropa árĩcũ Goãmũ ya pohe ãri maja yucũre ãgũ bũganemocũ iidiro dopa ta mũare ãgũ yare masinemocũ iimi ãgũ.

Eropigũ Goãmũ mũare ãgũ yarãre õarã árĩcũ ãgũ iimi. Eropirã mũa Goãmũ mohmeri wihi iro dopa ãhraa mũa gajĩ werenigũ queori mera werediãcũ. <sup>10</sup>Yũre Goãmũ ãgũ itamuro mera yũpũ wihi iimehregũ borari ãgũ nugumũhtaro dopa ta Jesucristo yare mũare buhemũhtabũ. Eropigũ ãri weca gajigũ ãgũ peoturã mũriaro dopa ta gajigũ yũ pũhrũ buhenemogũ iimi. Eropã buhenemogũ õaro gũhyadiaro mera Goãmũ yare buhero gahmea ãgũre. Queoro buhero gahmea. <sup>11</sup>Wihire iirã borãre nugumũhtabiricũ wihi iima masiya mara. Eropã ta Cristore buhebiricũ ãgũ yarã wacũ iima masiya mara. Cristo mari ya dipuwajare sĩribasarare mũare buhetuhajabũ. Eropirã mũa Jesucristore umupeorã Goãmũ yarã watuhajabũ. Mũa eropa árĩrãguere gajĩ buherire buhema masiya mara mũa Goãmũ yarã wamorãre. <sup>12-15</sup>Goãmũ yarãre buhenemorã ãhrima. Erã watope gajirã queoro buhema. Gajirã queoro buhebeama. Queoro buheri oro, plata, waja

pagari utāyeri iro dopa āhraa. Queoro árībiriri buheripū yucu, taa, ñaira pūri iro dopa āhraa. I umū pehrerinūri árīcū Jesucristo dujarigu mari buhera queoro árīcū ihmugūcumi. Mari buherare soēnagu iro dopa ta queoro árīcū ihmugūcumi. Eropiro oro, plata, waja pagari utāyeri soecū ūjubiro dopa ta mari buhera queoro ta árīro dujaroca īgu iacū. Eropa mari queoro buhenirā mari árīcū ōaro mari buhera waja wajayegūcumi. Eropa ta yucu, taa, ñaira pūri soecū ūjupehrero dopa ta mari buhera queoro árībīro pehreroca īgu iacū. Eropigu queoro buhebinirā mari árīcū īagu marire wajayesome. Erā eropa árīrā erā wajatabiriquerecū Goāmū erāpūre taugūcumi. Eropirā eropa queoro ōaro buhebinirā merogā mera tarirācoma. Eropirā wihi ūjurisubū tariro dopa tarirācoma.

16 Mña Jesu yarā mera Espírītu Santopū mña mera āhrimi. Eropirā mña Goāmū ya wihi iro dopa āhraa. ¿Irire masibeari mña? 17 Eropirā mña Goāmū ya wihi árīro dopa árīrā īgu yarā gohra āhraa. Eropigu īgu yarāre yujugū īgu goroweocū Goāmū peamegue dedeogūcumi īgūpūre.

18 Irire ōaro masique mña. Mña basi pee wisibiricāque. I umū maja buherire opagu “Masitarinūgagu āhraa,” arī pepibocumi. Eropa arī pepigu mña mera majagu árīgu, “Yuhū Goāmū masiri mariro pee masibigu āhraa,” arī pepiporo īgu. Īgu eropa arī pepigu diaye ta ōaro masigu wagūcumi. 19 I umū maja masa erā gamero erā basi masiri “Bu gohra ta āhraa,” arī pepimi Goāmū. Eropa ta werenemoa Goāmū yare erā gojarapū. Ōpa arī gojara āhraa: “Erā gamero masirā erā pepiri mera ‘Ōpa iirāra,’ erā arīrare gajiropa wacū Goāmū iimi,” arāa Goāmū yare erā gojarapū. 20 Eropi gajipūgue ōpa arāa daja: “Masa erā gamero ‘Masipehorā āhraa,’ erā arī pepiri duhpiburi árībiricū masimi mari Opū Goāmūpū,” arāa Goāmū yare erā gojarapūgue. 21-22 Eropirā “Pablo ya curu majarā āhraa gña,” arīrā, “Apolo ya curu majarā āhraa gña,” arīrā, “Pedro ya curu majarā āhraa gña,” arīrā arībiricāque mña pare. Gña árīpehrerā mña ya árīburire iirā dihta āhraa. Goāmū árīpehreri mña ya árīburire otuhajadigu árīmi. Īgu ihacūnugurare mña ya árīburire odigu árīmi muare. Muare ojocaricū iimi mña ya árīburire. Eropigu síricū säre iigūcumi mña ya árīburire. Dohpague mña árīrīre, pūhrūgue mña árīburi säre ogūcumi. Eropirā árīpehreri mera āhraa. 23 Eropirā muapū Cristo yarā āhraa īgu ya árīburire iimorā. Eropigu Cristopū Goāmū yagu āhrimi īgu ya árīburire iibu. Eropirā “Gña tamera Pablo ya curu majarā āhraa,” arībiricāque mña pare.

**Cristo īgu yare īgu buhedoregu īgu apinirā erā mohmerire werepū Pablo**

**4** 1 Ōpa arī pepique mña yūre, Apolo säre: Eropa ta erā Cristore mohme corerā āhrima. Eropirā “Masa erā masibirirare Goāmū yare buhedore īgu apinirā āhrima,” arī pepique mña. 2 Yujugū īgu ya árīburire iidore apinirāre īgu gamero dopa ta ii corero gahmea erāre. Yū säre eropa ta ii corero gahmea Cristo īgu gamerire. 3 Mña yūre werewūaquerecū eropa pepicāa yūhū. Gajirā masa erā yūre werewūacū säre eropa pepicāa yūhū. Yū iirire īarā “I ōari āhraa. I ñeri āhraa,” arī beyemasibea mña yūre. Yū basi árīqueregu yū iirire ōaro beyemasipehobeaa yū sā. 4 Ōpa arī pepia yūhū. “Mari Opū yūre īgu apidiro

dopa ïgu gamerire iipehorabu yũhu,” arĩ pepia yũhu. Yũ õpa arĩ pepiquerecũ ta yũ arĩ pepiri diaye áribiboca. Mari Opũ Cristo dihta yũ iiricũre ïagu õaro masimi yũ ïgu yare õaro iicũ. <sup>5</sup>Eropirã mari Opũ ïgu dujariboro core masare erã iirare arĩ werewuabiricãque. ïgu dujarigu masa erã iirare iribojegue gajirã erã masibirirare Cristo deyoro moagucumi. Eropirã mari iidiarare ïgu masicũ iigucumi gajirã masare. Irisubu ta mari nũcure ïgu yare mari iidiro dopa ta “Irire õaro iiabũ,” arĩgucumi Goãmu marire.

<sup>6</sup>Yũ acawerẽ, yũhu Apolo mera gũa áricũre werebu yũhu mũare buhebu. Eropa werebu Goãmu ïgu yare ïgu gojarapũ ïgu arĩdirore mũa tarinũgabiriboro dopa. Eropa tarinũgabitã árirã mũa yujurãyerire umupeobiricãque. Mũa eropa iibirã áritarinũgadiarã iiaa. <sup>7</sup>Mũa eropa iibiriboro dopa gũa iirare werebu mũare. Mũa eropa tarinũgadiaquererã mũapũ gajirã tauro õarã áribea mũa. Goãmu mũare ïgu ora dihtare opaa mũa. Eropirã ïgu mũare masicũ iira dihtare masia mũa. ¿Mũa gamero oparã, mũa bocatiuro masirã áribiriquererã ta, duhpirã “Masipehorã áhraa,” arĩri mũa? Eropa arĩrã “Goãmu gũare obirimi. Eropigu gũare masicũ iibirimi,” arĩdiarã dopa ta iiaa mũa.

<sup>8</sup>Mũapũ “Áriphrerire opaa gũa. Gũare ñehe duhyabea,” arĩraa mũa. Eropirã gũa mũa pohro áribiricũ õpa arĩ pepiraa: “Oparã iro dopa masirã áhraa gũa,” arĩ pepiraa mũa. Diaye ta oparã iro dopa mũa masipehorã áricũ mũare õatariaboya. Mũa eropa áricũ mũa mera gũa sã oparã iro dopa masipehorã áriboya. “Masirã áhraa gũa,” arĩ pepirã, ¿õaro arĩ pepiri mũa? Õaro pepibea yũ iacũ. <sup>9</sup>Õpa arĩ pepia yũ tamera: Goãmu gũare Jesu ïgu yare buhedore apinirã doca maja curu apimi gũare. I yeba majarã masa, anyua sã gũa ñero taricũ gũare iamũrima eropa wacũ. <sup>10</sup>Cristo yare gũa buhecũ ïarã, “Pee masibirã áhrima,” arĩma masa gũare. ¿Mũapũ Cristo yare õaro pee masirã áhriri mũa? “Turabirã, bu árirã áhrima,” arĩma masa gũare. ¿Mũapũ õaro turarã áhriri mũa? Mũa basire umupeoa. Gũapũre masa ne umupeobeama. <sup>11</sup>Gũapũ dohpagure ñero tarirã, oaboarã, ñemesiburã, ñeri suhricũrã, wiri moorã áhraa. Eropirã gũare gajirã umupeobirã, gũare pabiramũrima. <sup>12</sup>Eropirã gũa buheniguiquererã teboricũrã árirã gũa áriburi majare gũa baburi sãre mohmea. Eropirã gajirã gũare erã ñero wereniguiquerecũ ta gũapũ Goãmũre õaro erã áriburire serẽbasaa. Eropa iirã gajirã gũare ñero iimorã erã nũquerecũ ta eropa pepicãa gũa. <sup>13</sup>Eropirã “Ñero iirã áhrima,” gũare erã werewuquerecũ ta gũapũ erãre õaro wereniguia erã õaro áriburire. Eropirã erã bũrigã dohoma gũare. Iribojegue eropa iinũgama. Dohpague sãre mũraro ta iima gũare.

<sup>14-15</sup>Mũare õari buherire buhemũtabũ. Eropa buhecũ mũa peecũ Jesucristo mũare ïgu yarã wacũ iidi árimi. Eropa mũare buhedigu mũa pagũ iro dopa ta wahabu yũhu. Bajarã mũare Cristo yare buherã erã áriquerecũ ta mũare buhemũtagu yũhu yujugu ta áhraa. Eropigu yũhu yujugu ta mũa pagũ iro dopa áhraa. Eropigu mũare gũhasiricũ iibu ire gojagu iibea. Yũ porã yũ mahirãre mũare werebu ire gojaa yũhu. <sup>16</sup>Eropigu ire turaro mũare werebu iiaa yũhu. Yũre ñhacũque mũa sã.

<sup>17</sup>Mua eropa iicũ gamegũ mua pohro Timoteore obeogũ iiaa. Īgũ yũ magũ iro dopa yũ mahigũ mari Opũ Jesucristo yagũ àhrimi. Eropigũ Cristo gamero dopa iiniguigu àhrimi ĩgũ. Timoteo mua pohro ejagũ Jesucristo yare yũ iidiro dopa mũare guñacũ ĩgũcumi mua sã eropa iiboro dopa. Jesu yarã pohrogue noho wagũ Jesucristo yare erã iiburire buheniguicãa. <sup>18</sup>Yujurãyeri mua mera majarã oparã árdiara õpa arãñorã: “Pablo mari pohrogue arisome,” arĩ pepirañorã erã. <sup>19</sup>Goãmũ gamecũ mua pohrogue dohparagã ta ejagũca. Eropa ejagũ erã oparã árdiara mua mera majarã erã eropa arĩrare ĩagũra. Eropigũ erã Goãmũ turari opacũ ĩagũra yũhũ. <sup>20</sup>Goãmũ mari Opũ àhrimi. Mari arĩ weretarĩnũgaquerecũ ta ĩgũ yare mari iibiricũ mari wereniguiri duhpiburi áribea. Īgũ turari mera ĩgũ gamero dopa iicũ gahmemi. <sup>21</sup>¿Mua pohrogue mua ya dipuwaja dipuwaja moagũ yũ wacũ gahmeri mua yũre? ¿O mua õaro iira waja mucubiriri mera waro gahmeri mua yũre?

### Corinto majarã erã ñeri iirare werepũ Pablo

**5** <sup>1</sup>Gajirã õpa arĩ querecũma guare: Yujugũ mua mera majagũ ĩgũ buamore ta marapocũ waĩcumi. Eropa ta arĩ werema masa guare. Erã eroparicũ peemaria waha. Gajirãpũ Goãmũre masibirã áriquererã erãpũ eropa iirã áribeama. <sup>2</sup>Mua mera majagũ ĩgũ eropa iiquerecũ ta mũapũ “Õatariã áhraa gua,” arĩ pepiraa. ¿Duhpirã ĩgũ eropa ñeri iirare masiquererã ta guhyasĩrisãbeari mua ĩgũre? Eropa ñero iigure mua Jesu yarã mera majagũre cóacãque mua. <sup>3-4</sup>Yũhũ mua mera áribiriqueregũ ta yũ guñari mera mua mera áriũ iro dopa áhraa yũhũ. Eropigũ mua mera áriũ yũ áribodiro dopa ta ñero iigure ĩgũ eropa ñero iira dipuwaja, dipuwaja moadoretuhaa yũhũ. Jesucristo ĩgũ dorero mera ta eropa iidorea. Eropa mua Jesu yarã gamenererã yũ guñabeori merague yũhũ mua mera áricũ, mari Opũ Jesu ĩgũ turari mera <sup>5</sup>ĩgũre ñero iigure cóãque. Watĩ mera ĩgũ ñero tariborore apique. Eropa ta cóãque ĩgũre ĩgũ ñero tariri mera ñerire ĩgũ uaribejarire ĩgũ gohrotoboro dopa. Mari Opũ Jesucristo ĩgũ dujaririnũ ñero iidigũ mũarũ Jesu mera ĩgũ õaro tariboro dopa dohpaguere ĩgũre eropa apinique, arãa yũhũ.

<sup>6</sup>“Õaro áhraa gua,” mua arĩquererã ta ñero iirã iica mua. Nero iigũ ĩgũ ñerire mua eropa ĩacãrã, áripehreri ñeri mũare ii ĩhmucũ áripehrerã ñero iirãca. Eropiro áripehreri ñeri sehya wa mua árirogue. Panre buagacũ iiri pohga õaro seyanũgajaro dopa ta iri ñeri õaro seyaroca mũaguere. ¿Irire masibeari mũa? <sup>7</sup>Yũ acawererã judio masa Pascua áricũ ovejare wejẽmũrima erã ñeri iira dipuwajare Goãmũre cãdĩjidorerã. Oveja sĩridiro dopa ta Cristo mari ñeri dipuwajare sĩribasadi árimi. ĩgũ eropa sĩribasarañe mera mua ñerire cóãñirã áhraa. Irire guñarã mũapũ ñero iigure mua mera majagũre cóãque ñeri mua watope mariboro dopa. <sup>8</sup>Iribojegue ñerire ĩhacũ iinirã áriribũ mari. Eropirã dohpaguere mari ñerire cóãñirã áriřã mari ñerire uaribejaro mariro, ñero iiro mariro áriřã. Iribojegue mari ñerire iimũridiro dopa ta iibiricãrã. Eropirã diaye maja õaro wereniguiri mera, õaro iiricũri mera áriřã pare.



<sup>9</sup>Muare yu gojabeorapüre nome mera ñero iirã, ñerire iimajiñajarã mera ne wapicudorebiriribu. <sup>10</sup>Eropa arĩgu “Jesu yarã árĩbirã mera árĩbircãque,” arĩbiribu. Eropigu “Nome mera ñero iirã mera, gajinore turaro gamenemocãrã mera, yajaricurã mera, goãmarã wéanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta árĩmasibea. Árĩpehrerogue àhrima erãpu ta. <sup>11</sup>Eropigu muare gojabeogu õpa arĩ doreribu: “Mua mera majarã Jesu yarãpu erãpu ñerire iicũ ìha erãpüre wapicubircãque,” arĩ goja doreribu. Eropirã mua mera majagu “Jesu yagu àhraa,” ìgu arĩgu árĩqueregu ta nome mera ñero iigu, gajinore turaro gamenemogu, goãmarã wéanirãre umupeogu, ñero quiere moa coregu, merericũgu, yajaricũgu ìgu árĩcũ ìgũpüre wapicubircãque. Eropirã eropa iigu mera ne babircãque. <sup>12-13</sup>Jesu yarã árĩbirãpüre Goãmũpu dipuwaja moagũcumi. Eropigu Jesu yarã árĩbirãre erã ñero iiri dipuwaja moadoregu árĩbeaa yũhu. Eropa iibircãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mua Jesu yarãpu mua mera gamenererã mua basi mua iirare ìha masiro gahmea muare. Eropirã yujugu mua mera majagu ìgu ñero iicũ iarã ìgure dipuwaja moadorero gahmea muare. Eropirã Goãmũ yare gojarapũgue arĩdiro dopa muarpu mua mera majagure ñero iigure dipuwaja moaro dopa iirã ìgure cóaque.

### Jesu yarãre weresãrare werepu Pablo

**6** <sup>1</sup>¿Mua basi game dũyatorire duhpirã Jesu yarã árĩbirã pohrogue amudorerã wahari mua? Jesu yarãre mua mera majarãre weresãdiarã gajirã Jesu yarãre irire werero gahmea muare. Eropirã Jesu yarãpu amubasaporo. <sup>2</sup>Pehrerinũ árĩcũ mari Jesu yarãpu mari árĩpehrerã masa erã iirare beyerãca. ¿Irire masibeari mua? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari. <sup>3</sup>Anyua erã iira sãre beyerãca mari. ¿Irire masibeari mua? Mari eropa anyuare beyemorã árĩrã diaye ta dohpague sãre Jesu yarã erã iirare iarã beyemasica mari. <sup>4</sup>¿Eropirã duhpirã mua mera majarãre weresãdiarã Jesure gamebirã, “Bu árĩrã” mua arĩrã pohrogue amudorerã wahari mua? <sup>5</sup>Ire arĩgu iiaa mua guhyasiuro mua tariborore. Mua dũyatorire werebu õaro masigu árĩcumi mua watopere, yu arãa. <sup>6</sup>Ìgu eropa árĩquerecũ ta mua mera majagu Jesu yagu gajigu ìgu acaweregure weresãdiagũ Jesu yarã árĩbirãre beyedoregu wahami. <sup>7</sup>Masare beyegu pohrogue mua acawererãre weresãrã Goãmũ gameripüre tarinũgarã iiaa mua. Gajigu mua mera majagu muare ñero ìgu iicũ eropa ìacãboaya mua. Jesu yarã árĩbirãre mua weresãbiriborore mua acaweregure muare ìgu ñero iirare mua eropa ìacãcũ õatariaboaya. Jesu yagu muare ìgu yajacũ ìgure mua weresãboro core ìgu muare yajarare mua eropa ìacãcũ õaboaya. <sup>8</sup>Mua eropiibea. Gajirãre ñero iirã àhraa mua sã. Yajarã ta àhraa mua sã. Jesu yarã mua acawererã erã árĩquerecũ ta erãre ñero iirã, yajarã iiaa mua.

<sup>9</sup>Eropa iirã Goãmũ ïgũ opu áriroguere wamasibeama. ¿Irire masibeari mua? Pee wisibiricãque mua. Õpa iirã Goãmũ pohroguere wasome: Gajirã nome mera ñero iirã, goãmarã wéanirãre umupeorã, gajigũ marapore marapocurã, gajigũ marapũ mera ñero iirã nome, uma seyaro erã dũpũri mera ñero iirã, nome sã eropa ta iirã, <sup>10</sup>yajarã, gajinore turaro gamenemorã, merericurã, gajirã masare ñero quere moa corerã, gũyari mera yajarã ne Goãmũ ïgũ opu áriroguere wamasibeama. <sup>11</sup>Iribojeguere mua yujurãyeri eropa iirã áriyoro. Eropa iinirã mua áriquerẽcũ ta dohpaguere mua ñero iirare cóãtuhami Jesucristopũ. Eropa ïgũ taunirã mua áricũ ïgũ yarã árimorã iimi Goãmũ mũare. Eropa iigũ “Õarã áhrima,” arĩ íhami ïgũ mũare. Eropa ta iimi mũare mari Opũ Jesucristo mera, Espíritu Santo mera.

### Mari dũpũ õarire iiburi dũpũ áriro iiaa, arĩ gojañumi Pablo

<sup>12</sup>“Goãmũ iidorebirira áripehreri iimasiri áhraa yũre, arĩmi Pablo,” arãa mua yũre. Yũ iimasipehoqueregũ ta, yũ iiri yũre gajirã sãre itamubiricũ íha irire iibeaa. Eropa ta áripehreri iimasiri áhraa yũre. Eropa iimasiqueregũ ta yujuyerisuburi irire eropa iipogu duhumasibiriboca, arĩgũ irire iisome yũhũ. <sup>13</sup>Mari bari mari paru maja áriburi ta áhraa. Eropero “Mari paru bari dicũburiduru paru áhraa,” arãa mua yujurãyeri. Mũa eropa arĩquerẽcũ ta pũhrũ Goãmũpũ mari barire mari paru sãre iri pehrea wacũ iigũcumi. Eropirã mua yujurãyeri “Mari dũpũpũ mari uaribejari iiburi dũpũ áhraa,” arĩraa mua. Eropa arĩbeaa. Mari dũpũ uaribejari iiburi dũpũ arĩbeaa. Mari dũpũpũ mari Opũ ya áriburire iiburi dũpũ áhraa. Eropigũ mari Opũpũ mari mera áhrimi mari ïgũ yare õaro iiboro dopa. <sup>14</sup>Eropigũ Goãmũ ïgũ turari mera mari Opũ Cristo dũpũ mũarore masupũ. Eropa ïgũre masudiro dopa ta mari dũpũ sãre masugũcumi ïgũ.

<sup>15</sup>¿Mũa ya dũpũ Cristo ya dũpũ áriri iro dopa áricũ masibeari mua? ¿Cristo ya dũpũ áriri iro dopa áriãrã nomeo ñero iiricũgo mera mari áricũ õhari mua pepicũ? Õabirigohracãca. <sup>16</sup>Ñego mera yujugũ igo mera áricũ ïgũ dũpũpũ igo ya dũpũ mera áriro yuju dũpũ iro dopa ta áhraa. ¿Irire masibeari mua? Eropa arĩ gojara áhraa Goãmũ yare erã gojarapũgue. Õpa arãa: “Nomeo mũa mera áriãrã perã arĩquererã yuju dũpũ iro dopa wahama,” arĩ gojamũriñumi. <sup>17</sup>Mari Opũ ïgũ yarã mera áhrimi. Eropigũ yujugũ ïgũ mari Opũ mera perã arĩquererã yujugũ iro dopa áhrima erã guñari mera.

<sup>18</sup>Eropirã nome mera ñero iirire, uma mera ñero iirire uaribejabiricãque. Irire mua uaribejabiriboro dopa ta irire duhrigã waque. Gaji ñerire mari iira mari dũpũrere mari goroweobeaa. Nomeo mera ñero iigũpũ ïgũ dũpũre ñetariaro goroweomi. <sup>19</sup>Espíritu Santore marire ohomi Goãmũ. Eropigũ mari dũpũ mera wihicũmi Espíritu Santo. ¿Irire masibeari mua? Eropirã mua dũpũ mua ya dũpũ gohra arĩbeaa. Goãmũ ya dũpũ áhraa. <sup>20</sup>Mũa ïgũ yarã árimorãre mua ñeri dipuwajare wajayedigũ arĩmi Cristo. Eropirã ïgũ yarã áriãrã mua dũpũ mera Goãmũ ïgũ gamero dopa ta iique. Eropa iirã Goãmũre umupeorã iiaa mua. Eropirã gajirã sãre ïgũre umupeocũ iirã iiaa.

## Mojoto diririre werepũ Pablo

**7** <sup>1</sup>Dohpaguere mũa yũre serẽpi gojarare yũ sã mũaare yũhrigura. Masũ marapo maricũ sãre õhaa yũ ãacũ. <sup>2</sup>Iri eropa áriquerecũ ta ero mũa áriro baja Ƶaribejari áhraa. Eropirã Ƶma erã nũcu nome marapocũporo gajirã nome mera erã ñero iibiriboro dopa. Eropirã nome sã erã nũcu marapũcũporo gajirã Ƶma mera erã ñero iibiriboro dopa. <sup>3</sup>Eropigũ marapocũgũre ãgũ marapore õaro iiro gahmea. Igo marapũ sãre eropa ta iiro gahmea. <sup>4</sup>Marapũcũgo ãgũ dũpũ ãgũ ya dihta áribeaa. Igo marapũ ya sã áhraa ãgũ ãhadiburo dopa. Igo marapũ sãre ãgũ dũpũ ãgũ ya dihta áribeaa. ãgũ marapo ya sã áhraa ãgũ ãhadiburo dopa ta. <sup>5</sup>Mũa perã áriburire “Iibiricãrã,” arĩbita. Gajisubũ mũa perã Goãmũ mera mũa wereniguidiarã “I nũcu nũri duhunirã dohpa, Goãmũ mera wereniguirã dohpa,” yujuro mera eropa arĩrã duhumasia mũa. Mũa eropa duhura pũhrũgã mũa dipaturi mũa eropa áriniguidiro dopa ta árique daja watĩ ñero mũaare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árimũhtadiro dopa ta áriniguidicãque daja.

<sup>6</sup>Ire mũaare dohpague yũ arĩrare arĩgũ mũaare dore gohrari mera dorebeaa. Eropa weregũ iiaa mũa iiburire mũa masima õaro. <sup>7</sup>“Ƶma marapocũporo,” arĩquerecũ, áripehrerã mũa yũ iro dopa ta marapo marirã mũa áricũ õaboaya yũre. Mũa eropa áricũ gamequerecũ ta Goãmũ mari áripehrerãre yujuropa iimasiburire apibeami. Yujurãyerire marapocũmasiburire marapũcũmasiburire apimi Goãmũ. Eropigũ ãgũ gajirãpũre marapocũmasibiriburire marapũcũmasibiriburire apimi.

<sup>8</sup>Eropigũ marapo marirãre, marapũ marirãre, wapeweyarãre õpa arãa: Marapo marirã, marapũ marirã mũa árimasirã, yũ áriro dopa áricũ õhaa. <sup>9</sup>Eropa árimasibirã turaro nomere gahmema. Irire turaro Ƶaribejarã diaye ta marapocũcãporo. Nome sã marapũcũporo. Mũa eropa Ƶaribejarã mũa marapocũcũ õapũricãa. Eropiro marapũcũcũ sãre õapũricãa.

<sup>10</sup>Mũa marapocũrãre, marapũcũrã nomere õpa dorea: Yaha doreri gohra áribeaa i. Mari Opũ Cristo ire doredi árimi. Mũa nomerũ mũa marapũ sũmarãre cóãbircãque. <sup>11</sup>Mũa marapũ sũmarãre cóãrã, marapũ marirã dujaque. Dipaturi mũa marapũ áridigũ mera ahmu õaro áribircũ daja marapũ marirã dujaque. Eropirã mũa Ƶma sã mũa marasã nomere cóãbircãque.

<sup>12</sup>Eropigũ mũa sãre gajirã sãre õpa arãa yũhũ. Mari Opũ ãgũ dorediro áribeaa i. Yũhũ ãgũ apidigũpũ õpa arãa mũaare: Yujurãyeri mũa mera majarã Jesu yarãpũ Jesure umupeobirã nomere marapocũrã áhraa. Eropigũ õpa arĩ werea mũaare: Mũa marasã nome mũa mera erã dujadiacũ erã nomere cóãbircãque mũaapũ. <sup>13</sup>Eropirã yujurãyeri mũa mera majarã nome Jesu yarã nome Jesure umupeobirã mera marapũcũrã nome áhraa. Mũa marapũ sũmarã mũa mera erã dujadiacũ erãre cóãbircãque. <sup>14</sup>Mũa marapũ sũmarã Jesure umupeobirã erã áriquerecũ ta Jesu yarã nomere erã marapocũcũ, Goãmũ õarã Ƶma iro dopa ãhami erãre. Eropirã mũa Ƶmarũ Jesu yarã mũa áricũ mũa marasã nome Jesure umupeobirã

nome áribocoma. Erã eropa áriquerecũ ta mũa mera erã nome marapũcũcũ Goãmũ òarã nome iro dopa ìhami erãre. Ìgu eropa ìabiricũ mũa porã Jesure umupeobirã porã iro dopa áriboñuma. Eropigu mũa porã sãre òarã iro dopa ìhami Goãmũ. <sup>15</sup>Eropirã mũa ìmarũre mũa marasã nome Jesure umupeobirã nome erãpũ mũare cóãcũ òaroca. Mũa nome sãre mũa marapũ sũmarã Jesure umupeobirã erãpũ mũare cóãcũ òaroca. Mari òaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mũa erã marasã nome erã marapũ sũmarã áribeaa pare. <sup>16</sup>Mũa ìma mũa marasã nome mũa mera dujaquerecũ erã peamegue wabiriborore Jesure umupeocũ iimasibiriboca. Mũa nome sã eropa ta Jesucristore umupeocũ iimasibiriboca mũa marapũ sũmarãre. Eropirã erã mũare cóãdiacũ òaroca.

<sup>17</sup>Òpa ta iiro gahmea mũare: Áripehrerã mũa mari Opũ Cristo mũare ìgu áriðorero dopa ta árique. Goãmũ mũare ìgu apirare iique mũa. Irire áripehrero Jesu yarã gamenererãre eropa doreniguica yũhũ. <sup>18</sup>Jesu yarã mũa áriboro core circuncisión iinirã gasiro mero wiri aĩnirã árirã eropa ta dujaque. Eropirã Jesu yarã mũa áriboro core gasiro merogã wiri aĩbirinirã árirã mũa áriro dopa ta dujaque. <sup>19</sup>Dohpaguere gasiro mero wiri aĩnirã mũa áricũ duhpiburi áribeaa. Irire iibirinirã mũa áricũ sãre gajiropa wasome. Goãmũ dorerire mari iicũpũre iri tamera òhaa. <sup>20</sup>Eropirã Goãmũ Jesu yarã mũare ìgu aĩcũ irisubu mũa árimũhtadiro dopa ta dujaque.

<sup>21</sup>Goãmũ mũare Jesu yarã aĩboro core gajirã pohro majarã mũa áricũ òaroca. Eropã ta dujanique. Mũa Opũ ìgu mũare wiudiacũ wirique mũa. Mũa wiricũ sãre òaroca mũare. <sup>22</sup>Òpa arĩ pepique mũa: “Yũhũ masũ pohro majagu wiribiriqueregu ta dohpaguere Jesu yagu árigũ, ìgu wiudigu iro dopa àhraa ìgu yare iiboro dopa,” arĩ pepique. Eropã ta gajirã Goãmũ Jesu yarãre aĩcũ masa pohro majarã mũa áribiriquererã òpa arĩ pepique: “Dohpaguere Jesu pohro majagu àhraa yũhũ,” arĩ pepique. <sup>23</sup>Mari ñeri dipuwajare mari ìgu yarã árimorãre wajayetuhadi árimi Cristo. Eropirã ìgu dorero dopa iique. Mũa iiburire masa dorebircãporo. <sup>24</sup>Eropirã yũ acawererã, Jesu yarã árimorã Goãmũ mũare ìgu aĩcũ irisubu mũa árimũhtadiro dopa ta dujaque. Eropã dujarã Goãmũ mera òaro árique.

<sup>25</sup>Dohpaguere marapo marirãre, marapũ marirã sãre werediaa mũare. Yũ wereburi mari Opũ weredoreðiro gohra áribeaa. Eropã áribiriquerecũ yũhũ ìgu mojomoro ìadigu, ìgu itamudigu áricũ mũa yũ wererire òaro mera peerãca. Òpa werea mũare. <sup>26</sup>Dohpaguere mari ñero tarirã iica. Eropirã mũa áriro dopa mũa dujacũ òhaa yũre. <sup>27</sup>Eropirã mũare marapocũrã, marapũcũrã sã eropa ta dujaque. Erãre cóãbircãque. Marapo marirã, marapũ marirã sã mũa árirã eropa ta dujaque. Marapore o marapũre amabita. <sup>28</sup>Eropã yũhũ mũare arĩquerecũ “Marapocũgũra,” aricũ gajiropa áribeaa ìmare. Eropirã mũa nome sãre marapũcũdiacũ òaroca. Òpa àhraa. Irisubu ñero taririsubu marapocũrã, marapũcũrã mũare teboricũburi dujaroca. Eropigu mũare eropa teboricũri arĩgu, marapo marirã, marapũ marirã dujaque, arãa yũhũ.

<sup>29</sup>Yñ acawererã, eropa arĩgu õpa arĩdiagu iiaa. Mari ñero tariboro merogã duhyaa. Eropirã dohpaguere marapo marirã Goãmũ yare erã õaro mohmemasiro dopa ta, õaro mohmero gahmea marapocurã sãre. Eropirã marapucurã nome sãre eropa ta Goãmũ yare õaro mohmero gahmea. <sup>30</sup>Eropirã mari ñehamere orequererã Goãmũ yare mohmeboropure guñaro gahmea. Bosenũ árĩrã mucubiriquererã Goãmũ yare mohmeboropure guñaro gahmea. Mari asũrare opaquererã irire guñabiricãro gahmea. Goãmũ yare mohmero gahmea. <sup>31</sup>I yeba dohpague árĩro dopa pehrero iiaa. Eropirã i yeba majare iiburire wũaro guñabiricãro gahmea.

<sup>32</sup>Mũa gajinore wũaro mũa guñaricucũ gamebeaa yũhũ. Marapo marigu Jesu yagu árĩgu mari Opũ Jesu yare ñgu gamerire guñaniguimi. <sup>33</sup>Marapocugupũ Jesu yagu i yeba maja sãre ñgu marapo gamerire guñami. <sup>34</sup>Eropigu peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dũpũ, igo pepiri mera ta mari Opũ yago õaro árĩdiamo. Marapucugopũ i yeba majare igo marapũ gameripure burigã iidiamo.

<sup>35</sup>Ire mũare arĩgu iiaa mũare itamubu. Teboricũri dorerire mũare cãhmotadiabeaa. Eropa cãhmotadiabiriqueregu ta õaro mũa iicũ gahmea. Eropigu baja guñaricũro mariro Jesu mari Opũ ñgu gameri dihtare mũa turaro iidiacũ gahmea yũhũ.

<sup>36</sup>Mũa mera majagu ñgu mago igo buro wacũ ñagu marapucudoreporo ñgu igore. “Igre õaro iibeaa. Marapucuro gahmea igore,” arĩ pepigu ñgu arĩdiro dopa ta nomesoporo. Eropigo igo marapucumasimo. Eropa igore marapucudoregu ñero iibeami. <sup>37</sup>Gajigupũ ñgu magore “Marapucubiricãporo,” arĩbocumi. Yujugu mũmũre wereyudiro mariro, yujuñe ta pepigu árĩgu, “Igo marapucubiricãporo,” arĩgu õaro iimi. <sup>38</sup>Eropigo ñgu mago marapucudoredigo õaro wagocumo. Ñgu mago marapucudorebiridigopũ gajigo tauro õaro wagocumo dohpaguere ñero taririsubu árĩcũ.

<sup>39</sup>Marapucugore igo marapũ mera árĩniguicãdoremi Goãmũ. Igo marapũ sirira pũhũ igo gajigu mera igo gamegu mera marapucumasimo daja. Jesure umupeogure marapucuro gahmea igore. <sup>40</sup>Igo marapũ marigo dujago tauro õaro mucubirigo árĩgocumo igo. Eropa ta arĩ pepia yũpũ. Eropa arĩgu Espĩritu Santo ñgu gamero dopa ta arĩgu iiaa.

**Goãmarã wéanirãre erã umupeomorã waimũrã wejẽ erã  
apira barire Jesu yarã asũ baburire werepũ Pablo**

**8** <sup>1-4</sup>“Gua tamera õaro masia,” arĩ pepiraa mũa. Eropa arĩ pepirã mũa masiri mera gajirãre masitarinugadiarã iiaa mũa. Eropa iirã gajirãre itamubeaa mũa. Gajirãre umupeori mera mahirãpũ erãre itamua erã Jesucristore umupeonemoboro dopa. “Masipehocãa yũhũ,” arĩbiricãro gahmea marire. Eropa arĩrã õaro masibeeaa mari. Eropirã “Õaro masinibirica dohpa,” arĩ pepiro gahmea marire. Mari Goãmũre mahirãpũre marire masicũ iimi.

Eropigu goãmarã wéanirãre umupeorã erã pohro apira barire “¿Mari bamasicuri?” arĩ weregura mware: Goãmarã wéanirã ne duhpimorã áribeama. Diaye ta erã wéanirãre ne siporãri mara. Eropigu Goãmu yujugu ta áhrimi. Gajirã goãmarã marima. Ire mari masia. <sup>5</sup>Gajirã masa opa arĩma. “Mari goãmarã bajarã áhrima. Erã mari oparã áhrima,” arĩ pepirima. “Umusiguere, i yeba sãre goãmarã áhrima,” erã arĩquerecũ ta maripure yujugu ta Goãmu gohra áhrimi. <sup>6</sup>Ígu mari Pagu áripehrerãre, áripehrerire áridoredigu áhrimi. Eropirã ígu ya áriburire iimorã áhraa mari. Eropigu mari Opu Jesucristo yujugu ta áhrimi. Ígu áripehrerire mari Pagure ihacünugubasadigu áhrimi. Ígu yarã árimorãre iipu ígu marire. Eropirã ígu mera eropa áriniguirãca mari.

<sup>7</sup>Yu arĩdiro dopa ta eropa arĩquerecũ gajirã Jesu yarã irire masibeama. Iribojegue erã goãmarã wéanirãre umupeorã “Oã goãmarã ojocarirã áhrima,” arĩ pepimurĩnorã. Irisubuguererã eropa arĩponirã árirã dohpague sãre erã wéanirãre erã apira barire barã “Goãmarãre umupeorã iiaa,” arĩ pepirima. Eropirã iri barire barã, “Mari ñero iirã iiaa,” arĩ pepirima oaro masibirã. Eropirã “Ñerire iirã iiaa,” arĩ pepiquererã erã irire iicũ erã pepiri gajiropa waca. <sup>8</sup>Eropigu opa arĩ werea mware: Iri barire mari bacũ mari babiricũ sãre Goãmu mera oaro áricũ iibeaa marire. Irire mari babirã ñero iibeaa. Mari irire barã sã gajirã tauro oarã áribeaa mari, arĩ werea yuhu. <sup>9-10</sup>Eropa mware werequerecũ oaro iique mwa. Iri barire barã mwa áricũ gajirã Jesu yarã mware iabocoma. Mware iarãpu oaro masinibirã “Iri barire barã Goãmure umupeobeama,” arĩ pepirã árirãcoma. Eropa arĩ pepiquererã mware ihacũ erã sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mwa. Eropirã oaro iique. <sup>11</sup>Mwaru masirã árirã, “Gua iri barire gua bacũ oaroca,” mwa arĩ pepirã árirã gajirã oaro masibirinirãre ñero iicũ iiboca mwa mware erã ihacũcũ. Erã ya áriburi sãre siridi árimi Cristo. Eropirã mwa bari mera mwa Cristo yarãre mwa acawererãre ñero iicũ iirã erãre goroweoboca mwa. <sup>12</sup>Oaro masibirãre mwa acawererãre erã arĩ pepiro dopa iibiricũ erã pepiri gajiropa wacũ iiboca mwa. Eropa iirã Cristo sãre ñero iirã iiaa mwa. <sup>13</sup>Eropigu wéanirãre erã ora barire yu bagu yu acaweregure ñero iicũ iiboca yuhu. Jesu yarã erã ñero iicũ gamebeaa. Eropigu yuhu “¿Erãre ñero iicũ iiri?” arĩgu, iri barire ne dipaturi basome yuhu.

### Pablo Jesu ígu apidigu ígu árirare werepu

**9** <sup>1</sup>Jesu ígu yare buhedore ígu apidigu áhraa. Eropigu gajirã ígu apinirã erã iiro dopa ta iimasia yu sã. Jesu ígu apidigu ta áhraa yu sã. Mari Opu Jesure iadigu ta áhraa yu sã. Eropirã Jesu yare yu buhecũ mwaru irire oaro peenirã árirã ígu yarã wahabu mwa. Mwa eropa ígu yarã wara puhru Jesu ígu apidigu yu árirare masituhabu mwa. <sup>2</sup>Gajirã yure werewuarã “Ígu Jesu ígu apidigu áribeamí,” arĩbocoma. Erã eropa arĩquerecũ ta mwaru eropa arĩmasibeaa. Mware yu buhera puhru Jesu yarã warã, “Jesu ígu apidigu áhrimi,” arĩ yure masituhaa mwa. Eropirã gajirã erã werewuquerecũ ta mwaru ígu apidigu yu árirãcũre mwa masia.

<sup>3</sup>Yũre werewuarãre õpa ta arĩ yũhrigũra. <sup>4</sup>Mũare yũ buheri waja yũ baburire, yũ ihriburire yũre oro gahmea mũare. <sup>5</sup>¿Eropigu marapocũgu árigũ yũ marapo Jesu yago igo áricũ igo mera aĩ curimasibiribocuri yũhũ mũa pepicũ? Gajirã Jesu ãgu apinirã, Jesu pagũ porã, Pedro sã erã marasã nome mera erã curiro dopa ta yũ sã curimasiboaya. Yũ eropa curicũ yũ marapocũgu áricũ, igo sãre barire oboaya mũa. <sup>6</sup>Yũhũ Bernabé mera mũare õari buherire gũa buhequerecũ ta gũare ne gajinore obeaa mũa. Eropirã gũa basi ta gũa baburire mohme wajatabũ gũa. Gajirã Jesu apinirãpũre erã buheri waja oayoro mũa. ¿Gũa dihta eropa buherã, waja mariro buhero gahmeri mũa pepicũ? <sup>7</sup>Yujugũ surara ãgu mohmecũ ãgu oparã ãgu áriburire wajayemurima. ãgu basi wajayebeamĩ. Barire otegũ sã ãgu otera dũcacũcũ irire ta tea aĩ bamasimi. Eropigu ovejare ãhadibugũ ãgu ejorã apĩcore aĩmasimi ihribu ãgu sã. <sup>8</sup>Eropa arĩgu masa erã doreri dihtare mũare werebeaa. Goãmũ ãgu dorerigũe ãgu arĩra sãre mũare weregũ iiaa. <sup>9</sup>ãgu dorerire erã gojarapũgũe õpa arĩ werea: “Wecũ trigo yerire ãgu guburi mera ãgu suhri wearisubu ãgu badiacũ ãgu disirore cãhmotabiricãque,” arĩyoro Moise dorerigũe. Goãmũ eropa doregũ wecũare ãhadiburire arĩgu iibiriĩnumi. <sup>10</sup>Eropa doregũ gũare Goãmũ yare buherãre itamudorerore weregũ iĩnumi marire buhebu. Pohere sãanirã sã iri dũcare aĩnirã sã erã mohmera pũhrũ, dũcacũrisubu iri dũca wajataborore cohrema. Eropa mohmerãre barire oro gahmea marire. <sup>11</sup>Mũare Goãmũ ya buherire õari buherire buhebu gũa. ¿Gũa eropa buheri waja mũapũre gũare barire obiro gahmeri mũa pepicũ? Oro gahmea mũare. Mũa ocũ õaboaya gũare. Eropa áriquerẽcũ mũa obirimuribũ gũare. <sup>12</sup>Eropa gũare obirã áriquererã ta gajirã buherã mũare irire odorecũ mũa erãpũre ohayoro. Erã mũare odorecũ gũapũ erã tauro odoremasiboaya mũare turaro gũa buheri waja.

Eropa dorebonirã áriquererã ta gũapũ “Gũare oque,” ne arĩbiribũ. “Cristo ya buherire gamebiribocoma gũa dorecũ,” arĩrã gũare dũhyaquerecũ ta mũare ne odorebiribũ. <sup>13</sup>Masa Goãmũre umupeorã Goãmũ wihigũe bari aĩ apima. I wihi mohmerã iri barire aĩ bahama. Eropirã Goãmũre erã umupeori mesa pohro mohmerã waibũgũre erã soedigũe masa erã aĩ apidigũe merogã aĩ bahama erã sã. ¿Irire masibeari mũa? <sup>14</sup>Eropa erã iidiro dopa ta õari buherire buherãre erã buhera waja oro gahmea erã baburire. Eropa ta iidorepũ mari Opũ Jesu. <sup>15</sup>Eropigu mũare serẽbodi áriquerẽgu ta yũhũ gajinore ne serẽbiribũ mũare. Eropigu ire dohpaguere gojagũ gajinore waja gamebu gojagũ iibeaa. Mũare ne waja seadiabeaa. Sĩribũ áriquerẽgu ne waja gamesome yũhũ mũare. Waja mariro buhegu sũaa. Eropigu mũare iri buhera waja ne wajata basome.

<sup>16</sup>Õari buherire buhedoregũ apimi yũre Goãmũ. Irire buheri masũ árigũ tiiaa yũhũ. Õari buherire buhebigũ ñero waboaya yũhũ. Eropigu iri buherire buhegu “Gajirã masitarinũgagũ áhrra,” arĩbodigũ ne arĩbeaa yũhũ. <sup>17</sup>Õari buherire yũ gamero buhegu yũ buheri waja wajaseaboaya yũhũ. Yũ gamero buhebeaa. Goãmũ ãgu yare buhedoregũ apimi yũre. <sup>18</sup>Õari buherire buhegu mũare yũ buhera waja serẽmasiboaya yũhũ. Eropa serẽmasiqueregu ne gajinore serẽbigũ waja mariro iri buherire buhea

mũare. Yũhu eropa iigu árĩgu “Ōaro wajatagũca Goãmũ mera,” arãa. Iri ta ãhraa yũ wajatari.

<sup>19</sup>Eropigu yũhu masare buhegu erã yũ buherire peediacũ òpa iigu iiaa Jesu yarã erã waboro dopa. Ne masa pohro majagũ árĩbiriqweregu ta árĩpehrerãre pohro majagũ iro dopa iiaa yũhu erã yũ buherire peediacũ iigu. <sup>20</sup>Eropigu yũ acawererã judio masa mera árĩgu, judio masa iiro dopa ta iiaa yũhu yũ buherire erã peediacũ iigu. Goãmũ ìgu dorera Moisere ìgu apira yũre iri dorebiriqwerecũ ta, iri doreri dihtare umupeorã mera árĩgu erã dorerire umupeogu iro dopa ta ãhraa yũ sã. Eropa ta iiaa yũhu erã yũ buherire erã peediacũ iigu Jesu yarã erã waboro dopa. <sup>21</sup>Moise dorerire umupeobirã mera árĩgu iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhu erã Jesu yarã erã waboro dopa. Eropa iiqueregu Goãmũ dorerire umupeonigua. Cristo dorerire iiaa. <sup>22</sup>Eropigu òaro masibirã mera árĩgu erã iro dopa ta ãhraa. “Masipheogu ãhraa,” ne arĩbeaa yũhu erãre. Eropa ta iiaa yũhu erã sã Jesu yarã erã waboro dopa. Eropigu árĩpehrerã masa erã árĩricũro dopa ta iiaa yũhu erãre yũ buherire peediacũ iigu. Yujurãyeri Jesu taurã erã waboro dopa iiaa. <sup>23</sup>Eropa iiaa òari buherire árĩpehrerã erã òaro peeburire. Erã eropa peera pũhrũ Jesucristo erãre peamegue wabonirãre taumi. Eropigu yũhu erã mera òaro mucubiriborore eropa iiaa.

<sup>24</sup>Mũare werenigui queori mera òpa werea. Omabirarã erã omarã árĩpehrerã omama. Erã eropa omapehrequerecũ ta burigã omaturagupũ omajamũhtami. Eropa ejamũhtagũ wajatami. Eropirã erã burigã omadiro dopa ta mũa sã Goãmũ gamerire burigã iique mũa wajataboro dopa. <sup>25</sup>Árĩpehrerã omamorãpũ yũ dũpũre gajiropa iiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ìaboro dopa. Eropiro erã eropa ii erã wajatara bero mata pehrea wahaa. Mari sã Goãmũ yare òaro buhemorã gajinore duhucãrã mari wajataboro dopa. Iri mari wajatari tamera ne pehrebeaa. <sup>26</sup>Eropigu omabiragu ìgu noho gamero omaro dopa iibeaa yũpũ. Yũ gamero iimaacãbeaa. Goãmũ gamerire masigu iiaa gajirãre itamuboro dopa. <sup>27</sup>Eropigu yũ gamero dopa iibeaa. Yũ ùaribejari yũre dorebeaa. Masa erã Goãmũ mera taricũ itamuburi dihtare iiaa. Eropa iibigu gajirãre Goãmũ yare buhedigu yũ árĩquerecũ ta Goãmũ yũre “Ōaro iibũ,” arĩbiribocumi.

**“Goãmũ ãhrimi,” erã arĩ goãmarã wéanirãre umupeodorebiripũ Pablo**

**10** <sup>1</sup>Eropirã yũ acawererã, ire masique mũa. Mari ñecũ sũmarã mũa iribojegue majarã árĩpehrerã mũrague mera Goãmũ árĩmuriñumi. Ìgu imica curu mera erãre wamũhtañumi. Erã ìgure eropa nũrusia wahgãrã wũariya deco diariya waĩcuriya eja òaro taribuja wañuma. <sup>2</sup>Erã árĩpehrerã imica curu doca árĩnirã wũariya taribujanirã Moise yarã wañuma. <sup>3</sup>Eropirã erã árĩpehrerã ùmaro maja dijuri barire bamuriñuma. Goãmũ ìgu orire bamuriñuma. <sup>4</sup>Eropa barã erã árĩpehrerã Goãmũ ìgu ori deco sãre



ihrimuriñuma. Irisubuguerē erā ihriburi decore Goāmū īgū apira utāyegue iri decore wiridoreñumi. Erā iri deco ihridiro dopa Cristo iri utāye iro dopa īgū ta erāre ojocariro odi árĩñumi. Īgū erā mera árĩmuriñumi. <sup>5</sup>Erā eropa wanirā erā árĩquerecū ta erā mera majarā bajarā ñero erā iicū īagū Goāmū erāre īhasubiriñumi. Eropigū erāre masa marirogue boacū iĩñumi Goāmū.

<sup>6</sup>Erāre eropa wara marire güisāburi āhraa erā iidiro dopa ta mari ñerire uaribejabiriborore. <sup>7</sup>Eropirā goāmarā wéanirāre erā umupeodiro dopa iibita mña. Wecure erā wéadigure erā umupeodirore Goāmū yare erā gojarapū werero ōpa arāa: “Masa erā ba doaja ihrituha, wahgānugaja, bosenu iĩñuma,” arī gojamuriñumi iribojeguerē. <sup>8</sup>Puhrū gajirā erā mera majarā nome mera ñero iĩñuma. Erā iidiro dopa iibircāro gahmea marire. Erā eropa ñero iira dipuwaja yujunū ta erā veintitrés mil gohra masa sīria wañuma. <sup>9</sup>Gajisubugue gajirā erā yujurāyeri Goāmū erā gamero dopa iicū gamerā ōpa īgure arī turiñuma. “Mari Opū itamumasibeami marire,” arĩñuma Goāmure turirā. Eropa arī turirā īgure guacū iĩñuma. Erā iidiro dopa iibircāro gahmea marire. Erā eropa iira dipuwaja Goāmū erāre añaa mera cūri wejēdoreñumi. <sup>10</sup>Gajisubu daja erā mera majarā gajirā ñerā erā basi Goāmū iirare dūyasocū anyu masare wejēgūpū erāre wejēñumi. Eropirā erā iidiro dopa iibircāro gahmea.

<sup>11</sup>Eropa iĩñumi Goāmū marire buhebu. Maripū pehrerinū coregā árĩrā āhraa. Mari eropa árĩrā árĩcū iribojegue majarā erā eropa warare Goāmū gojadoreñumi marire güisāgū. <sup>12</sup>Eropirā mūapū “Yū tamera ōaro iiaa yūñū,” arī pepirā árĩrā ōaro iique ñerire iiri arĩrā. <sup>13</sup>Mari árĩpehrerā yujugū dūhyaro mariro yujuyerisuburi ñerire guñaa. Eropa guñarā iri ñerire iidiaa. Mari eropa iidiaquerecū ta Goāmūpū marire itamuniguicāgū iimi. Īgū arĩdiro dopa iigū āhrimi. Eropigū marire iri ñerire iidiarare tarinugacū itamumi. Marire guñaturacū iimi. Eropa guñaturarā warā iri ñerire iidiasome. Eropirā árĩpehreri ñeri iidiaquererā iri ñerire tarinugarāca.

<sup>14</sup>Eropirā mña yū mahirā yure peeque. Ne merogā goāmarā wéanirāre ne umupeobircāque. <sup>15</sup>Mña ōaro pee masirā mña árĩcū mñare werea. Eropirā yū arĩri diaye árĩcū masique mña. <sup>16</sup>Mari gamenere bocatĩrirā Goāmure “Ōhaa,” arĩra puhrū iri vino deco dicuripare ihria mari. Eropa ihrirā “Cristo mari ya ñero iira dipuwajare īgū di cóāra mera īgū mera árĩrā āhraa mari,” arī masia. Eropirā panrure mari Cristo yarā nuha barā iiaa mari. Eropa barā “Mari ya árĩburire īgū dūpū crusague sīrira mera mari īgū mera árĩrā yuju dūpū iro dopa āhraa mari,” arī masia. <sup>17</sup>Eropirā mari yujuru panrure nuha baro dopa árĩpehrerā mari Cristo yarā yuju dūpū iro dopa āhraa. Eropirā yuju curu ta āhraa.

<sup>18</sup>Moise dorerire iirā erā iirire guñaque mña. Goāmū wihigue erā waiñugure wejē soema Goāmure umupeomorā. Erā eropa wejē soera puhrū erā soedigure bahama. Eropa barā yuju curu ta Goāmū yarā árĩrā ta iima. <sup>19</sup>Ōpa ta arīgū goāmarā wéanirā diaye āhrima, arĩbeaa. Goāmarā marima, arāa. Eropirā goāmarā wéanirā eropáricārā iima. Eropiro goāmarā wéanirā pohrogue erā apira bariḡū bu gohra ta āhraa. Iri bari bacū marire gajiropa

iibeaa, arãa yũhu. <sup>20</sup> Yũhu eropa arĩqueregu ta iri barire mũa bacũ gamebirica. Õpa ãhraa iri: Jesu yarã árĩbirã goãmarã wéanirã pohrogue waibũgũre wejẽburire apirã Goãmũre umupeobeama. “Gũa goãmarãre umupeorã iiaa,” arirã watẽapũre umupeorã iima erã. Erã eropa umupeocũ erã umupeori wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa. <sup>21</sup> Bocatĩrirã vino deco dicuripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bamasibeaa mari. Eropirã goãmarã wéanirã pohro apira barire erãre umupeorã mera iri barire batamumasibeaa mari.

<sup>22</sup> Mari Opũ ĩgu yarãre mahimi. Eropirã eropa barã watẽa yarã iro dopa iirã ĩgũre guacũ iirãca. ĩgu guacũ mũa turabeaa ĩgu dipuwaja cãhmotaboro dopa.

### Goãmũ ĩgu gameri dihtare iique, arĩ gojañumi Pablo

<sup>23</sup> “Goãmũ iidorebirira árĩpehleri iimasiri ãhraa yũre,” arĩboca mũa. Mũa iiri ñeri iri árĩbiriqerrecũ ta irire iirã gajirãre itamubiriboca mũa. Eropirã Jesure umupeonemocũ iibiriboca mũa gajirãre. <sup>24</sup> Mari ya õaro árĩburi dihtare iibiricãro gahmea. Gajirã ya árĩburi sãre õaro itamuque mũa.

<sup>25-26</sup> Eropirã gajirãre itamuburire õpa iique: Bari duaroguere barire asũrã warã “¿I bari goãmarã wéanirã pohrogue erã apira bari ãhriri?” arĩ, serẽpiñabicãque. “¿Ñerire iiri?” arirã, serẽpiñaboca mũa. Goãmũ yare gojarapũgue õpa ãhraa: “I yeba árĩri árĩpehleri Goãmũ ya ãhraa,” arĩ gojañuma. Eropirã iri barire “Goãmũ badorebirira bari ãhraa,” arĩbiriçãque.

<sup>27</sup> Jesure umupeobigu mũare badoregu ĩgu sihucũ wadiarã waque. Eropa warã mũare ĩgu ejorire baque. “¿I bari goãmarã wéanirã pohro erã apira bari ãhriri?” arĩ serẽpiñabita. <sup>28</sup> Gajigu ero árĩgu õpa arĩbocumi mũare: “I bari goãmarã wéanirãre erã wejẽ apira dihi ãhraa,” arĩbocumi ĩgua. ĩgu eropa arĩ werecũ iri bari tamerare babita. Mũa eropa arĩ weredigu “Iri barire barã ñerire iirã iica,” arĩ pepibocumi. ĩgu eropa arĩ pepibiriboro dopa “Babita,” arãa yũhu mũare. <sup>29</sup> Eropa arĩgu mũa ya árĩburire weregu iibeaa. Mũa eropa iri barire weredigu ya árĩburipũre arĩgu iiaa mũare. Irire mũa bacũ ĩha mũare ĩhacũ ĩgu sã babocumi. ĩgũpũ eropa bagũ “Ñero iigu iiaa,” arĩ pepibocumi. Eropirã “¿Eropa iibocuri ĩgu?” arĩ iri barire babita.

“Babita,” yũ arĩcũ õpa arĩ yũhriboca mũa yũre: “¿Dohpa árĩrono gajigu gajiropa pepiri arirã gũa gamero iimasibiribocuri gũa? <sup>30</sup> Goãmũre gũa ‘Õhaa,’ gũa arĩra pũhũ gũa bacũ gajigu irire gũa barare gũare weresãmasibeami,” arĩboca mũa yũre. Yũpũ õpa yũhria. <sup>31</sup> I árĩpehlerire mũare yũ wererare weregu õpa arĩgu iiaa mũare: Õmuri nũcũ mũa mohmerã, barã, ihrirã, árĩpehlerire iirã irire Goãmũ ya árĩburi dihta iique. Eropirã árĩpehlerã masa Goãmũre “Õagu, turagu ãhrimi,” erã arĩ umupeoboro dopa iique. <sup>32</sup> Ne mũa iiri mera judio masare, judio masa árĩbirãre, Goãmũ yarã sãre goroweobiricãque. <sup>33</sup> Õpa iiaa yũpũ. Masa árĩpehlerã erã suaboro dopa iiaa árĩpehleri mera. Eropigu yũ gamero dopa iiniguicãbeaa yũa. Gajirã masa ya árĩburipũre õaro iiaa. Erãre Jesucristore umupeoborore eropa iiaa. Erã ĩgũre umupeora pũhũ erãre peamegue wabonirãre taugũcumi.

**11** <sup>1</sup> Cristo gajirã ya árĩburire árĩpeherrerire iimi. Eropirã Cristore yũ ìhacũdiro dopa ta mũa sã yũ iidiro dopa ta yũre ìhacũque.

**Corinto majarã erã gamenererogue nome erã iiborore wererũ**

<sup>2</sup> Mũare yũ árĩpeherrerire buherare, buhe turiarare guñapeo waĩcũabu. Eropa guñarã mũare yũ arĩrare yũ iidorediro dopa ta ii waĩcũabu mũa. Eropa iirã òaro iiaa mũa. <sup>3</sup> Dohpaguere i sãre mũa masicũ gahmea: Árĩpehererã ƿma opũ Cristo àhrimi. Eropigũ nomeo opũ ƿmũ àhrimi. Eropigũ Cristo opũ, ìgũ Pagũ Goãmũ àhrimi. <sup>4</sup> Mũa Goãmũre umupeo gamenerecũ yujugũ Goãmũre serẽgũ dipuru bua serẽgũ òaro ìgũ opũre umupeogũ iibeami. Goãmũ yare weretaugũ sã dipuru buagũ ìgũ opũre umupeobeami ìgũ sã. Eropirã ƿmapũ Goãmũre serẽã dipu buabiricãporo. <sup>5</sup> Eropigo nomeopũ dipuru buabigo Goãmũre serẽgo igo marapũre umupeogo iibeamo. Goãmũ yare werego sã dipuru buabigo eropa ta igo sã umupeobeamo. Eropirã nomepũ Goãmũre serẽã dipu buaporo. Dipuru buabigo igo poarire erã òaro wũapehodigo iro dopa ta àhrimo igo. <sup>6</sup> Dipuru buadiabigore igo poarire seapehoporo. “Yũ poarire sea wũapehodiabea. Gũhyasĩriboca,” arĩgo igo dipurare buaporo. <sup>7</sup> Mũa ƿmapũ Goãmũ iro dopa oparã àhraa. Eropirã Goãmũ òagũ, turagũ, ìgũ árĩricũre ìhmuma erãpũ. Eropirã erã dipu buabiricãporo. Nomepũ “Gũa oparã ƿma àhrima,” arĩ ìhmuma. Eropirã erãpũ dipure buaporo. <sup>8</sup> Goãmũ ƿmũre iigũ, nomeo ya dũpũ mera ƿmũre iibiriĩnumi. Nomeopũre iigũ, ƿmũ ya dũpũ mera igore iĩnumi. <sup>9</sup> Eropigũ ƿmũre iigũ sã nomeo yagũ árĩbure iibiriĩnumi. Nomeopũre iigũ ƿmũ yago árĩbore iĩnumi Goãmũ igore. <sup>10</sup> Eropirã mũa Goãmũre umupeorã gamenerecũ nome dipure buaporo anyua sã erã ìhasũaboro dopa. Eropa buarã “Ƴma gũa oparã àhrima,” arĩ ìhmurã iima. <sup>11-12</sup> Goãmũ nomeore iigũ, ƿmũ dũpũ maja mera iĩnumi. Dohpaguere ƿma masa dehyoarã nome dũpũgue masa dehyoama. Eropiro ƿmũ ìgũ árĩmũhtabiricũ nome mariboũuma. Eropi nome maricũ ƿma sã mariboũuma. Eropirã erã Jesu yarã árĩrã, ƿma seyaro nome seyaro árĩmasibeama. Goãmũpũ árĩpeherrerire apidi árĩmi. I yeba árĩrire i yeba iiburire apidi árĩmi.

<sup>13</sup> ¿Mũa basi dohpa pepiri? ¿Nomeo igo dipuru buabigo, Goãmũre igo serẽcũ òhari mũa pepicũ? Òabea. <sup>14</sup> Eropirã ƿmũ ìgũ poa ñapo ìgũ ómacũ ìha masa werewũama. Árĩpehererã masa irire masima. <sup>15</sup> Nomeopũ poa ñapo ómago árĩcũ òapũrica. Igo poari igo dipuru buari iro dopa ta àhraa. Iri sãre árĩpehererã masima. <sup>16</sup> Mũa mera majagũ ire yũ wererare dũyasodiagũ òpa masiporo ìgũ: Irire yũ arĩdiro dopa ta eropa dihta iiniguicãa mari. Gajirã Jesu yarã sã erã gamenererogue eropa dihta iiniguicãma.

### Bocatírirā erā barisubu goroweoñorā Corinto majarā

<sup>17</sup>Dohpaguere muare gajinore werebu, “Ōaro iirā āhraa,” arībeaa yūhu muare. Mña gamenererā ōaro iirā iibeaa. Eropirā mña gamenererore goroweorā iiaa. <sup>18</sup>Ōpa arī weremūhtagura muare: Mña gamenererogue eropa game dūyasorā mña basi yujurayeri cururi dūca wariayoro mña. Gajirā yūre irire erā eropa arī werecū “Diaye ta árīca,” arī pepia yūhu. <sup>19</sup>Eropa dūca warirā ōpa arīca mña: “Dūca wari wiriaro gameca marire Jesu yarā gohra árīrāpūre íhmuborore,” arīca mña basi. <sup>20</sup>Mña basi gamenere barā mña yujuro árībirā mari Opū Jesucristo dorediro dopa diaye ta bocatírirā iibeaa. <sup>21</sup>Mña gamenere barā yujurāyeri mña seyaro bamūhta, íhrimūhta gajirāre corero mariro. Mña eropiicū gajirā oaboa wahama. Gajirāpū merea wahama. <sup>22</sup>ÍMña seyaro badiarā duhpírā mña ya wirigue babeari? ¿Eropirā duhpírā dohpaguere Goāmū yarā gamenererore “Duhpíburi árībeaa,” arīdiari? ¿Eropirā duhpírā Jesu yarāre mojomorocurāre bari moorāpūre mña guhyasiūro taricū iiri? ¿Dohpa arī weregūcuri yūhu muare? Ōaro iirā iiaa mña, arībeaa yūhu.

### Goāmū yare bocatírirā diaye erā iiburire werepū Pablo

<sup>23</sup>Goāmū yare bocatírīburire mari Opū Jesu weremi yūre. Eropa ígu wererare yūpū muare irire werebū. Iri ōpa āhraa: Ígūre íhaturirāre Juda ígu sihurisubu iri ñami ta mari Opū Jesucristo panrure aī, <sup>24</sup>Goāmūre “Ōhaa,” arīpū. Ígu eropa arīra pūhrū iriru panrure nuha, ígu buherāre guerepū. Eropa gueregū ōpa arīpū: “Í yū dūpū āhraa. Mña ya árīburire sírigūca. Yūre mña guñaburire yūhu dohpaguere muare íhmuro dopa aī baque,” arīpū Jesu mari Opū. <sup>25</sup>Erā bara pūhrū ígu panrure aīdiro dopa ta íhriripare aīgū ōpa arīpū: “Mña ñeri iirare cóābu sírigūca. Eropa ígū yū dire cóāgūca. Yū di cóāra mera Goāmū masare ‘Mña mera amugūra,’ ígu arīdiro ojogorocūroca. Ipa dicūrire íhrirā yū di cóārare guñarāca. Ire íhrirā mña yūre guñaburire yūhu muare íhmudiro dopa iique,” arīpū Jesu. <sup>26</sup>Yū werediro dopa ta iru panrure mña barā, íhririre íhrirā, Jesu mari Opū mari ya árīburire ígu sírirare íhmurā iiaa mña. Eropa íhmuniguirāca mñapū ne ígu í yebague ígu dujaracūgue.

### Goāmū yare bocatírīmorā ōpa iique, arī gojañumi Pablo

<sup>27</sup>Mña Goāmū yare bocatírīmorā gamenere baha, íhrirā, umupeoro mariro guhyadiaro mariro iirā dipuwajacūrāca. Eropa iirā mari ya árīburire Jesucristo ígu dūpūre ígu di cóāra säre wereyaro dopa iirā iiaa mña. <sup>28-29</sup>Ōpa arī guñaro gahmea: “Mari Jesu yarā gamenererā yuju curu yuju dūpū iro dopa āhraa. Mari Jesucristo yarā āhraa,” arī guñaro gahmea. Irire queoro guñabirā, mari iri panrure baha, íhriripare íhrirā queoro iibirā mari dipuwajacūmorā árīrāca. Eropirā mari bocatírīboro core mari árīricūrire guñamūhtarō gahmea ñero iiri arīrā. Eropa iira pūhrū bocatīri ihri bamasia mari. <sup>30</sup>Eropa guña amubirira waja bajarā mña mera majarā dorecurā árīcoma. Erā yujurāyeri

turabirã áricoma. Eropirã gajirã erã eropa iira dipuwaja sîria wañuma. <sup>31</sup>Erã baha, ihriboro core erã áricurire ôaro guña, erã ñeri iirire duhuniã, erã ñeri dipuwajare dipuwajacubiriboñuma. <sup>32</sup>Mari Opupũ marire ïgũ yarãre dipuwaja moagũ mari ñeri iirire duhucũ iigũ iimi. Jesure gamebirãre ïgũ dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opũ.

<sup>33</sup>Eropirã yũ acawererã, bocatîrimorã gamenererã, mũa basi corenique. <sup>34</sup>Eropirã mũa mera majarã oaboarã, erã ya wihigue bamuhtaporo. Eropirã bocatîrimorã ôaro gamenere baque mũa ñero dipuwajacurã wabiriborore. Gajinore werediarabũ mũare. Pũhrũ yũ basi ejangũ mũare weregũra irire.

**Goãmũ ya áriburire mari mohmeburire apigũ marire irire  
iimasicũ iimi Espîritu Santo, arĩ gojañumi Pablo**

**12** <sup>1</sup>Yũ acawererã, ôpa mũare weregũ ire mũare masicũ gahmea. Goãmũ ya áriburire mari mohmeburire apigũ marire áripehrerãre irire iimasicũ iimi Espîritu Santo.

<sup>2</sup>Mũa Jesu yarã árinibirã gajiropa áriiri buherire pee nũrũã árirã, mũarũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa. <sup>3</sup>Eropa árinirã mũa áricũ dohpaguere ôpa arĩ werediaca mũare. Espîritu Santo itamuri mera wereniguirã “Jesu ñero waporo,” ne arĩmasibeama. Eropirã Espîritu Santo itamuri mariro wereniguirãpũ “Jesu áripehrerã wecague opũ mari Opũ áhrimi,” arĩmasibeama.

<sup>4</sup>Goãmũ ya áriburire mohmemasiburi baja áhrra. Irire marire iimasicũ iigũpũ yujugũ ta áhrimi. ïgũ Espîritu Santo áhrimi. <sup>5</sup>Eropiro Goãmũ ya áriburire iimasiri mera mari mohmeburi baja áhrra. Irire mari iiburire doregũ yujugũ ta mari Opũ Jesu áhrimi. <sup>6</sup>Mari ïgũ yarã ïgũ ya áriburire iimasiri mera mari mohmeri yujuropa ta áribeaa. Iri mohmeri ôaro wacũ iigũ yujugũ ta Goãmũ áhrimi. <sup>7</sup>Espîritu Santo marire Jesu yarã nũcure mari iimasiburire apigũ Goãmũ turarire ïhmugũ iimi. Ôpa ta iimi ïgũ Jesu yarãre áripehrerã mari ôaro mohmeboru dopa. <sup>8</sup>Yujurãyerire ôaro masiri mera werecũ iimi Espîritu Santo ta. Eropigũ gajirãre Goãmũ yare ôaro buhecũ iimi ïgũ Espîritu Santo. <sup>9</sup>Eropigũ gajirãre “Mari Goãmũ mera ôaro iimasia,” arĩ Goãmũre guñaturacũ iimi Espîritu Santo ta. Eropa iigũ gajirãre turarire Espîritu Santo ta ohomi ïgũ. Iri turarire ïgũ ocũ erãpũ dorecurãre ôarã wacũ iima. Espîritu Santo yujugũ ta árigũ iri turarire ohomi. <sup>10</sup>Eropigũ ïgũ gajirãre deyoru moarire iimasicũ iimi ïgũ. Eropa iigũ Goãmũ yare ôaro weretaumasicũ iimi ïgũ gajirãre. Eropa iigũ gajirã Jesu yarãre buherire ôaro beyemasicũ iimi ïgũ. Eropa masirã watĩ ya buheri áricũ masima erã. Espîritu Santo gohra ya iri buheri áricũ sãre masima erã. Eropigũ gajirãre erã peeyamarirã yare wereniguimasicũ iimi ïgũ. Eropigũ peeyamarirã yare erã wereniguicũ gajirãre weretaumasicũ iimi. <sup>11</sup>Iri áripehrerire iimasirire apigũ ta Espîritu Santo ta yujugũ ta áhrimi. ïgũ gamero dopa ta marire yujurãyerire mari mohmeburire apimi.

**Cristo yarā árīrā yuju curu ta āhraa mari, arī gojañumi Pablo**

<sup>12</sup>Werenigui queori mera muare weregura: Mari dũpũ yuju dũpũ árĩquerecũ ta, mojotori, cuiiri, guburi, gamiri, iri tamera baja āhraa mari dũpũre árĩri. Eropa āhraa mari Cristo yarā. Bajarā árĩquereerā ta yuju dũpũ iro dopa ta yuju curu ta āhraa ĩgu mera. <sup>13</sup>Eropirā Cristo yarā árĩrā ĩgu dũpũ iro dopa yuju curu ta āhraa mari. Judio masa, judio masa árĩbirā, pohro majarā, pohro majarā árĩbirā, baja cururi árĩquereerā ta yujugũ árĩgu ĩgu dũpũ iro dopa yuju curu ta āhraa mari. Espĩritu Santo yujugũ ta árĩgu ĩgu turari mera waĩyesũnirā marire yuju curu Cristo yarā árĩcũ iimi. Eropirā mari árĩpehrerā yujugũ Espĩritu Santore opaa Cristo ya curu majarā árĩrā.

Eropirā mari Cristo yarā yuju dũpũ iro dopa āhraa. <sup>14</sup>Mari dũpũ yuju dũpũ árĩquerecũ ta mojotori, cuiiri, guburi, gamiri iri mari dũpũ árĩri baja āhraa. <sup>15</sup>Mũ guburo wereniguiiri guburo árĩro ōpa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquereero ta mũ dũpũ maja árĩro ta iiaa. <sup>16</sup>Mũ gamiro wereniguiiri gamiro árĩro ōpa arĩboya mũre: “Mũ cuiuru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquereero ta mũ dũpũ maja gamiro árĩro ta iiaa. <sup>17</sup>¿Mari dũpũ cuiuru dihta árĩcũ dohpa peebocuri mari? Masiya mara. ¿Eropirā mari dũpũ gamiro dihta árĩcũ dohpa ii wĩji pepibocuri mari? Masiya mara. <sup>18</sup>Eropa árĩbeaa mari dũpũ. Ōpa āhraa. Mari dũpũ árĩrinore árĩpehrerire Goãmũ ĩgu gamero dopa ta apidi árĩmi mari dũpũre. <sup>19</sup>¿Mari dũpũ árĩri maricũ dohpa waboyuri mari dũpũ? Mariboya. <sup>20</sup>Mari dũpũ ōpa āhraa: Yuju dũpũ árĩquerecũ ta mari dũpũ árĩri baja āhraa. Eropa ta mari Jesu yarā yuju dũpũ iro dopa árĩquereerā bajarā āhraa mari basi game itamumorā.

<sup>21</sup>Eropiro mũ cuirupũ mũ mojotore “Mũ itamucũ gamebeaa,” arĩmasibeaa. Eropiro mũ dipuru mũ guburire “Mũ itamucũ gamebeaa,” arĩmasibeaa. <sup>22</sup>Gaji mari dũpũ árĩrĩre “Bu árĩñariri āhraa,” mari arĩripũre ƣpũtu gahmea mari. <sup>23</sup>Eropirā gaji mari dũpũ árĩrĩre “Bu árĩñariri āhraa,” arĩ pepia. Eropirā irire ōaro deyoporo arĩrā ōaro ahmua. Eropirā gaji mari dũpũ árĩrĩre mari gũhyasĩrĩsĩrĩre ōaro ahmua ōaro árĩboro dopa. <sup>24</sup>Gaji mari dũpũ árĩrĩre mata ōari deyoripũre eropa amubeaa mari. Goãmũ mari dũpũ árĩri yujuñe gajĩnere gamebircũ iibiridi árĩmi. ĩgu mari dũpũ árĩrĩre árĩpehrerire ōaro amudigu árĩmi yuju dũpũ ōaro dũpũcũburire. Eropa iigu “Bu árĩñariri āhraa,” mari arĩripũre mari ōaro gamecũ iimi. Eropa ta ne yujugũre Jesu yagũre “Bu árĩgu āhrimi,” arĩmasibeaa mari. <sup>25</sup>Eropa ta árĩdoređi árĩmi Goãmũ mari dũpũ árĩri yujuro mera iri basi game itamuboro dopa. <sup>26</sup>Mari dũpũ árĩri yujuñe ñero taricũ gaji mari dũpũ árĩri sã ñero taria. Eropiro mari dũpũ árĩri yujuñe ōaro árĩcũ mari dũpũ árĩpehrero ōaro pepia.

<sup>27</sup>Eropa arĩgu ōpa arĩdiagũ iiaa muare: Mũapũ Cristo ĩgu dũpũ iro dopa árĩrā yuju curu ta āhraa. Eropirā árĩpehrerā mũaa ĩgu dũpũ árĩri iro dopa

ãhraa ïgu yarã áriã. <sup>28</sup>Eropigũ Jesu yarã gamenererã watope mari game itamuburire apidigũ áriã Goãmũ marire. Õpa apipũ ïgu marire: Yujurãyeri guare buhedoregũ Cristo apimuhtadigũ áriã. Ero puhũ gajirãre ïgu yare weretaumorãre apidi áriã. Ero puhũ gajirãre Jesu yarãre buhemorãre apidi áriã. Eropigũ gajirãre deyoro moarire iimorãre, gajirãre dorecurãre erã taricũ iimorãre, erã puhũ gajirãre masare itamumorãre, gajirãre oparã árimorãre apidi áriã. Ero ojogoro peeyamarirã yare wereniguimorãre apidigũ áriã marire. <sup>29</sup>Eropa ïgu apicũ áripehrerã yujuropa iimorã áribeaa mari. Mari áripehrerã Jesucristo yare buhedore ïgu apinirã áribeaa mari. Eropirã Goãmũ ïgu yare weretaurã mari áripehrerã áribeaa. Eropirã áripehrerã masare buherã áribeaa. Eropirã mari áripehrerã deyoro moarire iimasirã áribeaa mari. <sup>30</sup>Eropirã mari áripehrerã dorecurãre taumasirã áribeaa mari. Eropirã mari áripehrerã peeyamarirã yare wereniguimasimorã áribeaa. Eropirã gajirã erã wereniguirire weretaumasimorã mari áripehrerã áribeaa. <sup>31</sup>Eropirã Goãmũ ya áriburire mohmemasiburiñere gamerã ðaripũre turaro gameque mua. Eropigũ áripehreri yũ arãra tauro ðaro mua iiburire dohpaguere weregura yũhũ.

#### Gajirãre erã ðaro mahiburire, umupeoburire wereñumi Pablo

**13** <sup>1</sup>Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã áribiriboya mari. Eropiro mari wereniguiri sã eropa busũmaacãboaya mari gajirãre mahibirã áriã. <sup>2</sup>Goãmũ yare ðaro weremuhtamasiquererã ta gajirãre mahibirã bu árimaacãrã áriboya mari. Eropirã masa erã masibirirare Goãmũ yare áripehreri masiri masipehoquererã ta gajirãre mahibirã, bu árimaacãrã áriboya mari. Goãmũre ðaro umupeotariri mera utãgu “Gajipũgue waporo,” arã wadoremasicquererã, mari gajirãre mari mahibirã bu áriã áriboya. <sup>3</sup>Mari yare áripehrerire mojomorocũre oquererã ta erãre mahibiricũ iri mari ora duhpiburi áribiriboya. Eropirã Goãmũ ya áriburire mari iira dipuwaja mari dupũre gajirãpu soequererã ta, gajirãre mari mahibiricũ iri duhpiburi áribiriboya.

<sup>4</sup>Gajirãre mahirã mata guabeaa erã mera. Erãre mahirã ðaro iiaa. Eropirã gajirãre mahirã erã marire opanemocũ iaturibeaa. Eropirã mari mahigũ mera áriã “Mũ tauro árigũ ãhraa yũhũ,” arã iibeaa mari. Gajirãre mahirã, “Erãre masitarinũgaa,” arã pepibeaa. <sup>5</sup>Eropirã gajirãre mahirã erãre umupeori mera queoro iiaa mari. Gajirãre mahirã mari ya áriburi dihtare guñabeaa. Erã ya ðaro áriburi sãre guñaa. Eropirã erãre mahirã disitũri wereniguibeaa mari. Eropirã marire erã ñero iicũ sãre erã mera guawajabeaa mari. <sup>6</sup>Gajirãre mahirã erã ñero iirire mucubiribeaa mari. Diaye majapũre erã iicũ iarã burigã mucubiria erã mera. <sup>7</sup>Gajirãre mahirã erã ñeri iicũ gajirãre ne quere moabeaa. Eropirã gajirãpu erãre erã werewuacũ peequererã ta irire peediabeaa mari. Õari dihtare peediaa mari. Gajirãre mahirã “Õarire iirãcoma,” arã cohrea mari erãre. Gajirãre mahirã erã iira mera mari ñero tariquererã ta erãre mahi duhusome mari.

<sup>8</sup>Gajirãre game mahiri ne pehresome. Goãmũ yare weretauripũ pũhrũ duhpiburi árisome. Peeyamarirã ya wereniguiri sã pehrea waroca. Goãmũ yare masitariri wajamariroca pũhrũgue. Mari masipehoro pũhrũgue duhpiburi gohra árisome iri. <sup>9</sup>Dohpaguere Goãmũ yare mari merogã masia. Eropirã mari ãgu yare wererã mari merogã weremasia. <sup>10</sup>Pũhrũgue ta mari masipehorãca. Eropiro mari merogã masira duhpiburi árisome. Irisubugue masipehorãca.

<sup>11</sup>Iri õpa ãhraa: Majigũ árigũ majigũ dopa wereniguiribũ yũhũ. Eropigũ majigũgã dopa pepiribũ. Eropigũ bugũ wagũ majigũ iro dopa árirare duhcũbũ. Eropa ta pũhrũguere mari dohpaguere merogã masirare duhura pũhrũ masipehorãca. <sup>12</sup>Diuru õaro masure deyocũ iibiro dopa ta dohpaguere õaro masipehonibeaa dohpa mari. Pũhrũ Goãmũre mari õaro ãhamasirãgue mari masipehorãca. Dohpaguere mari merogã dihta masia dohpa. Goãmũ marire ãgu masipehodiro dopa ta pũhrũ mari sã õaro masipehorãca.

<sup>13</sup>Eropirã dohpaguere mari iimasiburi ãhreũe dujaroca. Goãmũre “Diaye ta árigũ ãhrimi,” arĩ umupeoniguirãca. Eropirã marire ãgu mera õaro áriniguirire mucubiri coreniguirãca. Eropirã gajirãre game mahiniguirãca. Goãmũre umupeori, ãgu mera áriborore mucubiri coreri tauro ãhraa game mahiripũ.

#### Peeyamarirã yare wereniguirire wereñumi Pablo

**14** <sup>1</sup>Eropirã gajirãre game mahirã árique mũa. Eropirã Goãmũ ya áriburire mũa mohmemasiburire Espiritu Santo ãgu apirare turaro gameque. Goãmũ yare mũa weremasiburi tamerare burigã gameque mũa. <sup>2</sup>Peeyamarirã yare wereniguigũ Goãmũ dihta peeborore wereniguimi. Eropa arĩ wereniguigũ masa peeborore wereniguigũ iibeami ãgu. ãgu Eropa arĩ wereniguicũ peerã masapũ ne peebeama ãgũre. Masa erã masibiririre Espiritu Santo ãgu turari mera wereniguigũ iimi ãgu. <sup>3</sup>Goãmũ yare weretaugũpũ masapũ peeburire weremi. Eropa weregũ ãgu masare itamugũ iimi ãgu. Eropigũ erãre Jesucristore umupeonemocũ iimi. Eropigũ ãgu erã ñero taricũ ãgu erãre õaro siporãcũcũ iimi. <sup>4</sup>Peeyamarirã yare wereniguigũ ãgu basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaugũpũ gajirãre Jesu yarã gamenererãre Jesucristore umupeonemocũ itamumi ãgu. <sup>5</sup>Peeyamarirã yare áripehrerã mũa wereniguicũ õaboaya yũ pepicũ. Eropa áriquerẽcũ ta Goãmũ yare mũa weretaucũ tamerare turaro gahmea. Goãmũ yare weretaugũpũ peeyamarirã yare wereniguigũ tauro õagũ ãhrimi. Eropa áriquerẽcũ ta peeyamarirã yare wereniguigũ ãgu wereniguirire gajigũ ãgu weretaucũ ãgu sã õagũ dujami. ãgu wereniguirire weretaugũ Jesu yarã gamenererãre Jesucristore umupeonemocũ iimi. <sup>6</sup>Eropigũ, yũ acawererã, yũhũ mũa pohrogue peeyamarirã yare wereniguigũ wagũ mũare itamumasibiriboya yũhũ. Goãmũ ãgu yũre wererare weregũ itamua. ãgu yare Espiritu Santo yũre masicũ iirare buhegũ mũare itamugũ iiaa.



7Peeyamarirã ya wereniguigu ãgu wereniguiri mari peebiro òpa iro dopa àhraa. Tarusure purirã, mari buamutëriñere irire mari queoro iibiricü, iri bayarire gajirãre masima masiya mara. 8Eropigu cornetare purigu surara árigu erã gamewejëboro corere queoro ãgu puribiricü gajirã surarapü masisome erã gamewejëboro gamenerore. Eropirã erã gamewejëboro core erã wejëburi mojore amuyubirã àhrima erã. 9Eropa ta mua sã peeyamarirã yare wereniguicü peerã gajirã irire peebeama. Eropa peebiricü mua wereniguiri duhpiburi áríbea erãre. 10I yebare baja wereniguiri árica. Eropirã irire wereniguirã erã basi erã eropa wereniguirire òaro peema. 11Ígu ya wereniguirire yu peebiricü ãgu irire wereniguigupü “Gajirã yare wereniguimi,” arí pepicumi yure. Eropigu yu sã eropa ta arí pepica ãgure. 12Eropirã mua peeyamarirã yare wereniguirã, Espiritu Santo ãgu yare mohmemasi apira mera turaro mohmediaraa mua. Irire eropa iidiarã Jesu yarã gamenererãre òaro itamuburipure burigã mohmediaque mua.

13Eropigu peeyamarirã yare wereniguigu “Yu wereniguirire gajirãre òaro weretaumasiburire itamuque yure,” Goãmure arí serëporo ãgu. 14Peeyamarirã ya mera Goãmure serëgu yu pepiri mera serëgu iiaa. Eropa serëgu yu pepirire masibigu yu wereniguirire masibea. Eropa iigu gajirãre itamubea yuhü. 15Ire masirã, òpa iirãca mari: Espiritu Santo ãgu turari mera peeyamarirã ya mera Goãmure serërãca. Eropirã gajisubü òaro masi pepirã gajirã erã òaro peeboro dopa erã ya mera Goãmure serërã iri sãre serërãca mari. Espiritu Santo ãgu turari mera peeyamarirã ya mera Goãmü yare bayarãca. Eropirã gajisubü òaro masi pepi gajirã erã òaro peeboro dopa erã ya mera Goãmure bayarãca. 16Mari eropa iibiricü peeyamarirã ya mera wereniguirã Espiritu Santo ãgu turari mera Goãmure, “Óagu turagu àhrimi,” mari aríquerecü ta gajirã ne peebeama. Erã eropa peebirã “Diaye ta àhraa,” arímasibeama. 17Peeyamarirã ya mera Goãmure “Óhaa,” arímasia mari. Mari eropa ariri òaro aríquerecü ta gajirã peebeama. Eropirã erãre Jesucristore umupeonemocü itamubea mari. 18Árípehrerã mua tauro yupü peeyamarirã yare wereniguia. Eropigu Goãmü yure eropa wereniguimasigu ãgu iicü ãgure “Óhaa,” arãa yuhü. 19Eropa wereniguigupü yu aríquerecü Jesu yarã gamenererã watope peeyamarropa peebirã “Diaye ta àirã ya mera yoari boje yu wereniguiquerecü duhpiburi áríbea erãre. Yuhü masa erã òaro peemasiboro dopa buhegu merogã yu buhequerecü ta iri tamera òapürica erãre.

20Yu acawererã, majirãgã pee masibirãgã iro dopa áribiricãque mua. Murã erã pee masirã áriro dopa árique mua. Eropirã ne masa dehyoarã erã ñeri iirire erã masibiro dopa ta árique mua. 21Goãmü yare erã gojarapü òpa àhraa Goãmü wereniguirire: “Gajirã ya queo wererãre oã masare yahare weredoregura. Eropigu gaji yeba majarã masare òarire yahare weredoregura oã masare. Yu eropa weredorequerecü ta erã yure peesome yu wererire,” arími Goãmü mari Opü, àhraa Goãmü yare erã gojarapügue. 22Peeyamarirã yare wereniguiri Goãmure umupeobirãre erãre íhmuri àhraa. Eropiro peeyamarirã yare wereniguiri Jesu yarãpüre Goãmü turarire íhmuri áríbea. Eropiro Goãmü yare wereripü Jesure gamebirãre Goãmü turarire íhmuri áríbea. Goãmü yare wereripü Jesu yarãpüre

Goãmũ turarire ihmuri ãhraa. <sup>23</sup>Eropirã mua Jesu yarã gamenerecũ, peeyamarirã yare mua áripehrerã wereniguicũ, Goãmũ yare masibirã gajirã Jesure umupeobirã sã ñajari peebocoma. Mua eropa wereniguicũ peerã, erã mũare “Cue, goroweorã wahama,” arĩbocoma erã. <sup>24</sup>Áripehrerã mua Goãmũ yare mua werecũ tamera Goãmũ yare masibigu, Jesure umupeobigu sã ñajari peegu, ïgu ñero iirare masigucumi ïgu. Eropigu ïgu ñeri iirare bujawerebocumi ïgu. <sup>25</sup>Eropigu ïgu áriřicũrire ïgu pepiri sãre guñagucumi ïgu. Eropigu mereja Goãmũre “Yũ opu ãhrimi,” arĩgu umupeogucumi. Eropigu “Goãmũ diaye ta mua mera ãhrimi,” arĩgucumi ïgu mũare Goãmũ yare werecũ peegu.

**Mua gamenererã òaro iique goroweoro mariro, arĩ gojañumi Pablo**

<sup>26</sup>Eropigu, yũ acawererã, mũare ire arĩgu iiaa: Mua gamenerecũ yujurãyeri mua mera majarã Goãmũ yare bayadiama. Eropirã mua gajirã buhediaa. Eropirã gajirã Goãmũ mũare ïgu wererare werediaa. Eropirã mua gajirã peeyamarirã yare wereniguidiaa. Eropirã mua gajirã iri wereniguirire weretaudiaa. Mua eropa iirã gajirãre erã Jesucristore umupeonemoboro dopa irire iique. <sup>27</sup>Eropirã peeyamarirã yare mua wereniguirã mua perã o ñrerã, erã nũcũ ta wereniguique mua gamenererisubu. Eropirã yujurãyeri wereniguique. Mua eropa wereniguicũ, yujugu mua mera majagu mua wereniguirire gajirãre weretauporo. <sup>28</sup>Mua wereniguirire weretaubu maricũ mua gamenererogue peeyamarirã yare wereniguibiricãque. Eropirã mua seyaro peeyamarirã yare Goãmũ mera wereniguique. <sup>29</sup>Eropirã Goãmũ yare werediarã perã o ñrerã iripẽta wereque mua. Mua eropa werecũ gajirã mũare peerã mua wererire Goãmũ ya áricũ òaro masiporo. Eropirã Goãmũ ya áribiricũ sãre òaro masiporo. <sup>30</sup>Eropigu Espĩritu Santo Goãmũ yare gajigũre ero doagũre ïgũre wereri ocũ, ïgu sã Jesu yarãre werediami. ïgu werediacũ ïha Goãmũ yare weremũtagũpũ werenigui duhuporo. <sup>31</sup>Eropirã mua áripehrerã Goãmũ yare wererã, yujurãyeri wereque mua áripehrerã gajirã erã òaro peeboro dopa, erã òaro mucubiriboro dopaa. <sup>32</sup>Eropirã Goãmũ yare wererã árirã, òaro pee masirã, òaro peeñanugu wereniguirã áriřique. <sup>33</sup>Goãmũ ïgu yarã erã gamenererogue erã game wisicũ gamebeamĩ ïgu. Goroweoro mariro erã òaro áricũ gahmemi ïgu. Eropirã òaro iique mua áripehrerogue Jesu yarã gamenererã.

<sup>34</sup>Áripehrero Jesu yarã gamenererore nomere wereniguibiricãro gahmea. Erã nomere maripũ wereniguidorebeaa. Goãmũ yare erã gojarapũ sã arĩro dopa ta nomere mũare òaro yũhrirã nome arĩro gahmea. Eropirã mua gamenererore nome masare werebiricãporo. <sup>35</sup>Jesu yarã erã gamenererore nome erã wereniguicũ òabeaa. Eropigo gajinore masidiago nomeo igo ya wihigue ta igo marapũre serẽpiporo.

<sup>36</sup>Ire yũ wereburi òaro masique mua. Goãmũ yare weremũhtarã áriřbeaa mua. Eropirã ïgu yare peenirã mua dihta áriřbeaa. Gajirã sã ïgu ya buherire opama. <sup>37</sup>Mua mera majagu “Yũ tamera Goãmũ yare weregu ãhraa,” arĩ pepibocumi. Eropa arĩ pepigu i yũ mũare gojarare “Goãmũ doreri ta ãhraa,”

arĩ masiporo ïgu. Eropigu gajigu, “Espĩritu Santo iimasiburire ïgu apirare ðaro opaa yũhu,” arĩ pepibocumi. Eropa arĩ pepigu ïgu sã i yũ mware gojarare “Goãmũ ya doreri ta ãhraa,” arĩ masiporo. <sup>38</sup> Irire ïgu masidiabiricũ yũ gojarare “Diaye áribeaa,” ïgu aricũ ïgure duhucãque. Peebiricãque ïgure.

<sup>39</sup> Eropirã yũ acawererã, Goãmũ yare weremasiburire burigã gameque mwa. Eropirã mwa mera majarã mwa gamenererogue peeyamarirã ya erã wereniguidiacũ, “Wereniguibiricãque,” arĩbiricãque erãre. <sup>40</sup> Eropa iirã ðaro iique. Eropirã gamenererã ðaro game, goroweoro mariro iique mwa.

### Cristo ïgu masa mũriarare werepu Pablo

**15** <sup>1</sup> Dohpaguere yũ acawererã, ðari buherire yũhu mware wererare mware guñacũ iidiaca. Iri buherire ðaro peeby mwa. Eropa peerã iri buherire umupeonijarã ðaro ãhraa mwa. <sup>2</sup> Mwa eropa umupeocũ irire mwa cóãbiricũ Cristo mware peamegue wabonirãre taugucumi. Mwa eropa peera pũhrũ Cristo yare mwa duhucãcũ iri mwa peera duhpiburi áribiriboya.

<sup>3</sup> Òpa arĩ weremũtagura mware. Bu gohra áribeaa. Mware buhegu yũre Cristo ïgu wererare ðpa arĩ wereby: Goãmũ yare erã arĩ gojayudiro dopa ta mari ñeri wajare Cristo siripu. <sup>4</sup> Eropigu Goãmũ yare erã arĩ gojayudiro dopa ta Cristo ïgu sirira pũhrũ gajirã ïgure erã yaara pũhrũ uhrenũ waboro ïgu masa mũriaru. <sup>5</sup> ïgu eropa masa mũriara pũhrũ Pedore dehyoaru. ïgu eropa dehyoara pũhrũ ïgu buherãre doce mera majarãre dehyoaru daja. <sup>6</sup> Erãre dehyoara pũhrũre yujusubu ta quinientos weca árirãre ïgu yarãre dehyoaru daja. Gajirã ïgure ïanirã sirituhañorã. Gajirã ïgu ïanirã bajarã erã mera majarã árinirã dohpaguere árinima. <sup>7</sup> Pũhrũ Cristo Santiagore dehyoaru daja. Eropa ïgu dehyoara pũhrũ áripehrerã ïgu buhedore apinirãre dehyoaru daja.

<sup>8</sup> Áripehrerã gajirãre ïgu dehyoara pũhrũ yũ sãre dehyoami daja. Majigugã queoro masa deyobigugã ïgu masa dehyoanũrsiadiro dopa ta yũ sã Jesure umupeo nũrsiagu ãhraa. Yũ eropa áricũ erã pũhrũre dehyoami Jesu yũ sãre. Yũre ta ïgu dehyoatumi pare. <sup>9</sup> Ero coregue Jesu yarãre ñero iiribu. Eropa iidigu árigu gajirã Jesu ïgu apinirã áripehrerã erã docague gohra ãhraa yũhu. Eropigu dohpague sãre Jesu ïgu buhedore ïgu apibodigu áribiriribu yũhu. <sup>10</sup> Eropa áriqueregu ta Goãmũ ïgu yũre mahicũ dohpaguere Jesu ïgu apidigu ãhraa yũ sã. Eropigu ïgu yũre mahicũ dohpaguere ïgu gamerire iipehoa. Eropigu ïgu yũre mahicũ ïgu yagu eropa áricãgu iibea. Áripehrerã gajirã ïgu apinirã tauro yũru turaro mohmeabu. Eropa mohmegu yũ gamero iri mohmerire iibirabu. Goãmũ yũre mahigu yũre itamuami. <sup>11</sup> Yũhu mware ðari buherire buhegu yũ áricũ erã mware buherã áricũ sãre yujuropa ãhraa. Gũaru ire buherã áriquererã ta bu gohra árirã iiaa. Gũa buheripu bu árii áribeaa. Eropirã mwaru i buherire ðaro peeabu.

### Sĩrinirã mura erã masa mũriaborore werepũ Pablo

<sup>12</sup> Cristo ĩgu sĩrira pũhrũ ĩgu masa mũriarare gua buhequerecũ “Sĩrinirã mura ne masa mũriabeama,” arĩma mũa mera majarã yujurãyeri. ¿Dohpa arĩrono eropa arĩri erã irire? <sup>13</sup> Ōpa masiporo erã. Sĩrinirã mũrare Goãmũ masa mũriacũ iibigũ Cristo sãre ne masa mũriacũ iibiriboñumi. <sup>14</sup> Eropigũ Cristo ĩgu masa mũriabiricũ òari buherire gua werera ne waja mariboya. Mũa ĩgure umupeori sã waja mariboya. <sup>15</sup> Masa mũriari maricũ gũapũ Goãmũ yare wererã gũyarã iiboya. Sĩrinirã mura erã masa mũriabiricũ Goãmũpũ Cristore masa mũriacũ iibiriboñumi. ĩgu eropa iibiricũ gua “Goãmũ Cristore masa mũriacũ iipũ,” arĩrã gũyarã iiboya. <sup>16</sup> Sĩrinirã mũrare Goãmũ masubigũ, Cristo sãre ĩgu masubiriboñumi. <sup>17</sup> Eropiro Cristo ĩgu masa mũriabiricũ ĩgure mũa umupeori waja mariboya. Eropiro mũa ñeri dipuwajacũrã áriboya dohpa peamegue wamorã. <sup>18</sup> Masa mũriariñe maricũ Cristo yarã mũa sĩrimũhtanirã mura peamegue wamorã áriboñuma. <sup>19</sup> Cristore mari umupeora pũhrũ mari sĩrirãgue mari masa mũriamasibirimorã áriã áripehrerã masa tauro mojomorocũrã áriboya maripũ. Eropirã ĩgure umupeorã bu gohra áriřire umupeorã iiboya mari.

<sup>20</sup> Eropa áribeaa. Diaye ta Goãmũ Cristore òaro masa mũriacũ iicãdi árimi. Cristo ĩgu masa mũriara pũhrũ mari sã sĩrirãgue masa mũriamorã ta áhrra. ĩgu eropa masa mũriagu, Cristo masa mũria gubuyecũñumi marire. <sup>21</sup> Ōpa ta áhrra i: Adán masũ árimũhtadigũ ĩgu ñerire iinũgara pũhrũ masa sĩrinũgañuma. Eropigũ gajigũ masũ Jesucristo òarire ĩgu iira pũhrũ sĩrinirã mura masa mũriamasima. <sup>22</sup> Adán yarã árinũrusiarãgue mari áripehrerã sĩrirãca. Eropa ta Cristo yarã mari áricũ mari sĩrira pũhrũ marire masa mũriacũ iigũcumi Goãmũ. <sup>23</sup> Yujurãyeri cururi marire Goãmũ sihurisubu masa mũriarãca. Cristo marire árimũhtadigũ masa mũriamũhtapũ. Pũhrũ ĩgu i yebague dujaricũ ĩgu yarã sã masa mũriarãcoma. <sup>24</sup> Irisubu ta i mũpũ pehrerĩnũ áriřoca. Eropigũ áripehrerã ñerã oparãre, dorerãre, turarãre Cristo cóãgũcumi. ĩgu eropa iira pũhrũ áripehrerã weca opũ ĩgu áriřare wiagũcumi Goãmũre mari Pagure. <sup>25</sup> ĩgu wiaboro core mari Pagũ Cristore ĩhaturĩrãre ĩgu tarĩnũgapehoboro core Cristo tamera áripehrerã weca opũ áriřũcumi. Eropa iibu ta áriřo gahmea ĩgure. <sup>26</sup> ĩgure ĩhaturĩrãre ĩgu cóãra pũhrũ sĩririñe sãre pehrerũ iigũcumi ĩgu. <sup>27</sup> Goãmũ yare gojarapũgue òpa áhrra: “Áripehrerã weca dorebure apipũ Goãmũ Cristore. Áripehreri sãre apipũ ĩgure.” Eropa ta arãa Goãmũ yare erã gojarapũgue. “Áripehrerã weca dorebure apipũ Goãmũ Cristore,” arĩ gojagu, “Goãmũ weca doregũ Cristo áhrimi ĩgu,” arĩdiabiriñumi. Goãmũpũ Cristore eropa apiñumi. <sup>28</sup> Áripehrero Goãmũre ĩhaturĩrãre ĩgu cóãra pũhrũ áripehrerã weca doregũ Cristo Goãmũ magũ ĩgu árituhagu ĩgu opũ áriřare Goãmũre ĩgure apidigũpũre wiagũcumi. Eropiigũcumi “Goãmũpũ áripehrerã weca opũ áripehreri opũ gohra áhrimi,” áripehrero áripehrerã arĩmasiboro dopa.

<sup>29</sup> “Sĩrinirã masa mũriasome,” arĩma gajirã. ¿Erã arĩri diaye áricũ duhpimorã gajirã masa sĩrinirã mura ya áriřurire erã waĩyebasanirã

ãhriri mua pepicũ? Sîrinirã mura masa mûriabiricũ erã ya áriburire gajirã waïyebasara duhpiburi áribiriboya.

<sup>30</sup>Гуару гуа buheri dipuwaja umuri nucu gajirã guare erã ñero iidiacũ guhya ãhraa guã sãre. Guare eropa guhyaquerecũ ta masa mûriari áricũ masirã eropa buheniguicãa guã. <sup>31</sup>Mari Opu Jesucristo yarã mua áricũ ñgure umupeonemorã mua wacũ yuru turaro mucubiri pepia yuhu mure. Iri diaye ta ãhraa. Eropigu “Yure noho erã gamerinu wejẽmaja guhya ãhrima,” yu aricũ iri sã diaye ta ãhraa. <sup>32</sup>Efeso majarã guarã õari buherire yu buhera waja yure pama. Masa mûriariñe maricũ Jesu yagu yu áribiricũ, yu ñero tarira waja duhpiburi áribiriboya. Sîrinirã mura erã masa mûriabiricũ õpa ariboya mari: “Puhruñari sîrirãca. Dohpa wasome mari. Eropirã bania, ihrirã, mari gamero dopa iirã,” ariboya mari.

<sup>33</sup>Eropa arĩ guyarire pepibiricãque mua. “Ñerãre wapicurã, õarire mua iirare cãdijirãca mua,” arima masa. Iri diaye ta ãhraa. <sup>34</sup>Õarire pepirã árique mua. Eropirã õarire iirã árique daja. Eropirã ñerire iinemobiricãque daja. Gajirã mua mera majarã ne Goãmure masibeama. Mua guhyasiriburire mure eropa arãa.

### **Sîrinirã mura erã masa mûriaborore werenemopu Pablo**

<sup>35</sup>Eropi mua mera majagu õpa arĩ serẽpibocumi yure: “¿Dohpa ii sîrinirã mura masa mûriarãcuri? ¿Dohpa bejari dupucurã masa mûriarãcuri? arĩ serẽpibocumi yure. <sup>36</sup>Eropa arĩ serẽpigũ pee masibigu ãhrimi. Oteriyere mari oterã iriye boacũ gohra puhri wiria. Boabiricũ ne puhri wirimasibeaa. Irire masia mua. <sup>37</sup>Puhritaridigu yucugugure otebeaa mari. Dipayeri dihtare otea mari. Iriyeri trigo yeri áriro ãhri, o gajiyeri áriro arica. <sup>38</sup>Iriyerire mari otera puhru Goãmuru ñgu gamediro dopa ta iriyerire buga mûriacũ iimi. Eropigu ojuducayerire ojuducañu wacũ iimi ñgu. Trigo yerire trigo sari wacũ iimi. Europa ta puhridoremi Goãmũ. <sup>39</sup>Árĩpehrerã dupucuri yujuropa deyobeaa. Masa dupuru yujuropa ta ãhraa. Waimurã dupu sã gajiropa ta dehyoa. Mirimagũ porã dupu sã gajiropa ta dehyoa. Eropirã wai sã gajiropa ta dupucuma. <sup>40</sup>Eropirã umaro majarã sã ãhrima. Eropirã i yeba majarã sã ãhrima. Eropirã umaro majarã dupu gajiropa dehyoma. Eropiro i yeba majarã umaro majarã iro dopa árĩbeama. <sup>41</sup>Õpa ta ãhraa. Abe umu majagu gosemi. Eropi ñami majagu sã boje ãhrimi ñgu sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari iacũ gaji dipu daberogã gosesiriri dipu dehyoa. Eropiro gaji dipu turaro gosesiriri dipu dehyoa. <sup>42</sup>Eropa ta ãhrima sîrinirã mura erã masa mûriacũ. Masu ñgu dupure mari yaara puhru ñgu dupu boa waroca. Eropiro gaji dupu gajiropa áriri dupu umuri nucu ojocariburi dupu masa mûriaroca. <sup>43</sup>Ñgu dupure mari yaacũ sîridigu dupu ñeri dupu ãhraa. Goãmũ ñgure masucũ ñgu dupu õatariari dupu árĩroca. Eropiro ñgu dupu mari yaara dupu turari mariri dupu ãhraa. Eropiro Goãmũ ñgure ñgu masucũ dupu turatariari dupu árĩroca. <sup>44</sup>I yeba maja dupure mari yaarãca. ñgu sîridigu muru ñgu masa mûriacũ ñgu dupu umaro maja dupu ta árĩroca. I yeba maja dupure mari opaa dohpagure. Puhru umaro maja dupu sãre oparãca.

<sup>45</sup>Eropa ta arĩ werea Goãmũ yare erã gojarapũgue: “I yeba árĩmuhtadigu Adán waĩcũgu Goãmũ ãgũre iicũ ojocarigu wañumi,” arĩ gojañuma. Adán iro dopa árĩgũpũ ujutũyagũpũ Cristopũ ojocarire ogũ àhrimi. <sup>46</sup>I yeba maja dũpũ árĩmuhtara dũpũ àhraa. Pũhrũgue umaro maja dũpũ árĩroca. <sup>47</sup>Õpa ta àhraa: Árĩmuhtadigu Adánpũ i yeba maja nicu mera Goãmũ ãgu iira dũpũre dũpũcũñumi. ãgu pũhrũ aridigũpũ Cristopũ umaro majagũ árĩpũ. <sup>48</sup>Nicu mera dũpũcũmuhtadigu Adán árĩdiro dopa ta mari árĩpehrerã nicu mera iira dũpũcũrã àhraa mari. Eropirã umarogue aridigu Jesucristo ãgu árĩdiro dopa ta ãgu yarã árĩpehrerã ãgu iro dopa dũpũcũrãca mari. <sup>49</sup>Mari Adán iro dopa ta dũpũcũrã árĩrã pũhrũ Cristo iro dopa dũpũcũrãca.

<sup>50</sup>Yũ acawererã, mũare ire werediaa: I yeba maja dũpũ di mera diro mera árĩri dũpũ Goãmũ ãgu opũ árĩroguere umaroguere ne wasome. Mari dũpũ boaburi dũpũ àhraa. Eropiro umarogue umũri nũcũ mari árĩboroguere i dũpũ wasome. <sup>51-52</sup>Iribojeguere masa erã masibirirare dohpaguere mũare werediaa: Mari mera majarã yujurãyeri sĩrisome. Eropirã mata erã dũpũre gohrotorã árĩrãcoma. Corneta ãgu puriturinũ eropa ta waroca marire. Õpa waroca: Corneta busũra pũhrũ sĩrinirã mũare Goãmũ masũgũcumi umũri nũcũ erã árĩmorãre. Eropirã dũpũre gohrotonirã árĩrãca mari sã. <sup>53</sup>Dohpaguere mari dũpũ boaburi dũpũ àhraa. Eropigu mari Goãmũ mera árĩniguicãburire mari dũpũre gohrotogũcumi Goãmũ. Eropigu mari sĩriburi dũpũre gohrotogũcumi mari ne sĩribiburi dũpũpũre. <sup>54</sup>Mari dũpũre ne boabiburi dũpũre gohrotogũcumi. Eropigu marire sĩribiburi dũpũre eropa árĩniguiburi dũpũre gohrotogũcumi. Iri eropa marire gohrotocũ iribojegue Goãmũ yare gojarapũgue arĩ gojadiro dopa ta eropa waroca: Goãmũ sĩririñere cõacãmi. <sup>55</sup>Dohpaguere ne dipaturi sĩrisome. Eropiro sĩririñe mera dipaturi mari ñero tarisome. <sup>56</sup>Mari ñeri iira waja árĩcũ tamera sĩririñe mera ñero tarirãca. Eropiro Goãmũ doreri mari iimasibirira waja dipuwajacũca mari. Eropa dipuwajacũrã peamegue mari masa wamorã àhraa. <sup>57</sup>Mari eropa árĩquerecũ ta mari Opũ Jesucristopũ marire peamegue wabiricũ iimi. ãgu eropa ãgu árĩcũ masirã Goãmũ mera mucubiri “Õhaa,” arãa mari.

<sup>58</sup>Eropirã yũ acawererã, yũ mahirã, Cristore mũa umupeorire duhubiricãque. Eropirã gajirã mũare õari buherire erã cõãdorecũ ne cõãbircãque irire. Eropirã umũri nũcũ mari Opũ Jesucristo ãgu iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árĩbeaa. Ire masirã ãgu iidorerire õaro iiniguicãque mũa.

**Gajirãre Jesu yarãre Corinto majarã niyeru erã oburire werepũ Pablo**

**16** <sup>1</sup>Dohpaguere gajirãre Jesu yarãre mũa niyeru oburire weregũra mũare. Galacia yeba majarãre Jesu yarãre yũ dorediro dopa ta mũa sã iique. <sup>2</sup>Semanari nũcũ soorinũ árĩcũ árĩpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohrogue yũ ejacũ mũa obeoburi niyeru opayutuhaboro

dopa. Eropigu erogue ejagu iripẽ niyeru wahasõ arĩripũre gojabasagura. <sup>3</sup>Eropigu iripũre iri niyeru aĩgãmorãre mua beyenirãre ogura. Eropa otuhagu Jesu yarãre mua obeoburi niyerure aĩgãmorãre erãre obeogura Jerusalẽgue. <sup>4</sup>Iri macaguere yu iiburi áricũ yu sã waguca. Yu eropa wacũ yu mera ta erã sã warãcoma iri niyeru orã warã.

### Ĩgu erogue curiborore werepu Pablo

<sup>5</sup>Macedonia yeba majarãre ïhatari wahgãguca yũhu erãre. Tariagu mua pohro Corintogue ejaguca. <sup>6</sup>Erogue ejagu mua mera bajamenuri áriboca yũhu gajisubu iigu. Yoañariri boje puhiró dihta mua mera áriboca yũhu. Eropirã gajipugue yu wacũ mua sã yure itamubeomasia. <sup>7</sup>Muare bajamenurigã ïadiabirica yũhu. Eropigu Goãmu gamecũ yoañariri boje mua mera áriguca yũhu. <sup>8</sup>Eropa árdiaqueregu ta pentecoste bosenu áricũgue Efeso áriniguca dohpa. <sup>9</sup>Ohõ Efesogue dohpaguere mari Opũ Jesu yare peediarã bajarã áhrima. Erã eropa árirã áricũ erãre werea. Yũhu erãre eropa werecũ yure ïadiabirã bajarã áhrima. Eropigu Efesogue áriniguca dohpa.

<sup>10</sup>Timoteo yu iro dopa ta mari Opũ yare iimi. Ĩgu eropa iigu áricũ mua pohrogue ĩgu ejacũ òaro mera ĩgure bocatĩri, ĩgu mera òaro mucubiriri mera árique mua. <sup>11</sup>Eropirã ĩgure tarinugabiricãque mua. Eropirã ĩgu muare goeriserecũ òaro mera ĩgure itamuque ĩgu yu pohrogue dujaricũ. Gajirã Jesu yarã mera gna ĩgure corerã iiaa. Eropirã òaro mera itamubeoque ĩgure.

<sup>12</sup>Apolo mari acaweregu Jesu yagu muare ĩgu ïagu wacũ turaro gamerabu. Eropigu ĩgure wadorerabu gajirã Jesu yarã mera ĩgu waborore. Yu eropa wadorequerecũ ta ĩgu dohpaguere wadiabeami. Eropigu puhru ĩgure iiri maricũ mua pohrogue wagućumi ĩgu daja.

### Pablo òadoretupu

<sup>13</sup>Òaro pee masiyurã árique mua. Cristore umupeorã duhubiricãque. Òaro guñaturarã árique. Eropirã Goãmu ya turari mera turarã árique mua. <sup>14</sup>Áripherore iirã gajirãre mahiri mera irire iique.

<sup>15</sup>¿Estéfana ĩgu ya wihi majarã mera guñari mua? Erã Acaya yeba majarã òari buherire peemuhtarã, iri yebare Cristore umupeomuhtanirã árima erãpu. Eropirã gajirãre mari acawererãre Jesu yarãre erã òaro itamuniguicãma.

<sup>16</sup>Eropigu erã iro dopa árirãre, gajirãre Cristo yare itamurãre mua òaro yuhricũ gahmea yũhu. <sup>17</sup>Ĩgu Estéfana, Fortunato, Acaico sã yu pohrogue eratumama. Ohõ erã áricũ wũaro mucubiria yũhu. Mua maricũ mua mera mucubirimasibiribu yũhu. Eropigu erã eracũ mucubiria yũhu. <sup>18</sup>Erã mera árigu òaro siporãcũgu wahabu yũhu. Mua sãre eropa ta mucubiricũ iiañuma yu pepicũ. Mua pohrogue erã dipaturi wacũ daja erãre òaro umupeoque mua. Eropirã gajirãre erã iro dopa árirã sãre umupeoro gahmea muare.

<sup>19</sup>Asia majarã Jesu yarã muare òadorema. Eropirã Aquila, Priscila, erã ya wihi gamenererã mera Cristo ĩgu mahiri mera muare wũaro

õadorema. <sup>20</sup>Õ majarã Jesu yarã árĩpehrerã mũare õadorema. Mũa mera majarãre bocatĩrĩrã õaro mera mojoto ñeaque.

<sup>21</sup>Үһһ Pablo, уһ basi i dihtare gojaa. Mũare õadorea.

<sup>22</sup>Mari Opұ Jesucristore gajigұ ĩgұ mahibiricű, Goãmұ ĩgұre dipuwaja moaporo. Mari Opұ duru dujariporo.

<sup>23</sup>Mari Opұ ĩgұ mahiri mera mũare õadorea. <sup>24</sup>Mũare árĩpehrerãre bũrigã mahia Jesucristo mera. Eropa ta árĩporo. Iripěta ãhraa.